




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

APERILA 2015

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## Faiva Alofilima o le Mataupu Silisili

Saunia e Faalepo A. Tuisuga  
Kolisi Faafaifeau i Malua

**Faatomuaga:**

Ua saunia leni tusiga ua na o se  
motuga'afa tatou te fefaasoa'a'i ai

i mafauauga lelei ua saunia ma  
faapa'iaina e le Agaga o le Atua.  
*silasila itulau e 4*



Pei lava ni mata Saleapaga mata o  
tamaiti ia. E iloa ona o le aulelei.

**"Lo'u Afafine e, o Lou  
Faatuatua ua e Malolo ai"**

*silasila itulau e 17*

## Ia Mau'alalalo ni o Tatou A'a

Sa matou tua'oi ma se toaina  
matua e suafa ia Dr. Gibbs. E le  
foliga i se foma'i, ae tele ina foliga  
fama. E ese a fo'i ona uiga. O  
*faaaauau itulau e 11*

**O Se Tala Mo Ulugalii  
Talavou fia fai Pisinisi**

**Ua le Manuia?  
Leai! Ua na o ni  
nai Fa'ava'atu'ia**

*faaaauau itulau e 10*

O le Mafuaaga o le Pese:

**All Glory Laud  
and Honour**

*silasila itulau e 7*

**Tapua'i Faalilolilo  
ia Keriso**

*silasila itulau e 18*

**O le Ola i Luga o le  
Fata Faitaulaga**

*silasila itulau e 6*

---

# O LE LAUGA

*saunia e*

**Rev. Simalu Kovati Tuila'epa - EFKS Taga Savaii**

Feagaiga Tuai: Eseta 7:1-10

Feagaiga Fou: Luka 19:1-10

Matua: Luka 19:10: “Aua ua sau le Atalii o le tagata e saili ma Faaola i le na leiloa.”

Manatu Autu (Theme) “Lepeti” pa-puipui uma o loo taofia tagata mai le Faaolataga

“Lepeti” - E tutusa lelei ma le: faaleaga, talepe, soloia, faatama'ia.

“Faaolataga” - Sa'olotoga poo le Faasa'olotoina, ola fiafia. A o “pa puipui” e pei ona ta'ua - E faatatau i ni mea leaga ua faia e i latou o loo iai le malosi ma le paoa e pulea ai isi tagata. Poo e foi o loo ta'ita'i ma fai ma faauluuluga.

O i latou foi ia, fai mai, e le aiaina e se isi a latou faaiuga fai. O le mea lava e fai atu e fai, o lena lava. E sa le toe tali mai. O a latou gaioioiga ia, ua noatia ai le avanoa e maua ai e le toatele, poo e foi oi lalo o a latou ta'ita'iga ma pulega, le sa'olotoga poo le fiafia atoatoa e tataua ona soifua ma ola sa'oloto ai e fai le mea sili.

Ua le afaina foi ia i latou le oi ma le pagatia o tagata, a ia usita'ia pea le mea ua manana'o ai, aua o loo manuia ai lava latou. E leai se leo o tagata lautele, aua o le taimi lava e faaleo atu ai lagona o tagata, o le taimi foi lena e tulai ai i luma o le fale pa'epa'e.

E tali mai loa, ua aisi i le faasalaga mai tama sese.

Ai lava e taumafa atu Hamanu i le taumafataga lona lua lea na saunia e le masiofo o Eseta, ae pei e lavea ai se mea i le fa'a'i. Pe ailoga foi na manogi lelei sa na tausami i ni kuka manogi ma felanulanua'i a Eseta. Aua foi na manatu lava, o ia, le tagata o loo

sili ona fiafia i ai le tupu, ma o ia foi ua ave iai le faatuatuaga o le tupu.

Na usua'i ane Hamanu i le maota o le tupu i lana galuega masani. Pei o ia le faufautua sili a le tupu. Na alu ane la Hamanu ma lana fautuaga i lea aso: Ia faatautauina Moretekai i le laau ua uma ona ia saunia. Ae peitai na mua'i fesiligia o ia e le tupu i le fesili faapea: “Hamanu, o le a se mea e tataua ona fai i le tagata ua loto le tupu ina ia faaneeneina o ia?” O lona uiga, o le tagata ua sili ona fiafia iai le tupu.

E le faigofie ona faamatuu atu ni faailoga taualoa i se tagata, vagana o se tagata ua tulaga ese ni mea lelei na te faia, aemaise mo le manuia o tagata lautele poo se malo foi. Ia poo se tagata foi ua lafo iai le faatuatuaga mo le lelei ma le manuia lautele.

Faalogo atu Hamanu - Ah! ia o ai oi sili? Leai a se isi na o a'u. Lona uiga o le mea lava ou te fai atu ai, o le mea foi lena e fai ia te au. Fai mai lana tali: O le tagata ua finagalo le tupu e faaneeneina, ia faia ia te ia mea nei:

Ia faaofu i le ofu o le tupu; Ia ti'eti'e i le solofanua a le tupu; Ia faapale i le palealii o le tupu; Ona faataamilo lea i le malae, ae alalaga iai tagata.

Ua te'i si toaina o Hamanu i le faapea atu o le tupu: Ia e vave atu nei e fai mea uma na ia Moretekai.

Talofa e, Talofa i le tagata ati pa, ma faufau mea leaga. Tiga le faigata, ae na alu lava e fai, leaga o le finagalo lea o le tupu. O se tala faanoanoa lea na foi ma ia i lona aiga ma ana uo, aemaise si ona to'alua o Seresa ma lana tapuaiga.

Fai mai le tala, e alu atu le ave'a'i

ia Hamanu e sau ia i le taumafataga ma le tupu, e maua atu a e auauna, o la e faamatala lana tala lea i lona aiga.

Ioe, o Hamanu, o ia lea na atia le pa vaeloto lea ua pologa ai nei Sa Iuta i le va ma le malo o Peresia ma lo latou tupu o Asueru. O ia lea na fautuaina le tupu ina ia fasiotia uma Sa Iuta, ona ua le usita'i i ana tulafono, ma ua fai foi i latou ma tagata faafiufiu i totonu o le malo.

Fai mai na avaga le tofa a le tupu ma to'ese ai lana mama auro ma avatu ia Hamanu e fai ma faamau faailoga i le tulafono lea, ma faasalalau loa i le malo atoa. O le tulafono lea ua faalauiloa nei, e faapea: O le aso 13 o le masina lona 12 o Atara (Tesema), o le a fasiotia uma ai Sa Iuta, o taulele'a ma toelaiina, o tamaiti ma fafine.

O se tala faavauvau lea mo Sa Iuta uma. O le ala la lea o taumafaiga nei a Moretekai ma Eseta lea ua fai nei ma masiofo a le tupu, ina ia toe tafa le finagalo o le tupu mo se lavea'i a o se faaolataga mo lona nuu.

E alu ane la Hamanu i le taumafataga lona lua lea, ua le manogi se mea'ai. Aua o lea ua fesiligia e le tupu le masiofo o Eseta: O le a se mea e te faatoga mai ai, e oo i le vaeluaina o le malo, e faia lava.

O le avanoa lelei lea na faato'ai ai loa e Eseta le mana'o o lona nuu, ma maua ai loa lo latou lavea'iina, ma lo latou faaolataga.

O le solosolo lelei o le sootaga o Hamanu ma le tupu, aemaise o le tele o ana fautuaga sa lima ta'ita'iina ai pulega a le tupu, lea na faaofi ofi atu ai ma le fafauina o le pavelotoina ia faaoo ai le leaga

---

# O LE LAUGA

i le nuu o le Atua.

O le iuga o le tagata atipa, o le toe tautau i lana laau na fafau e pei o le iuga o Hamanu. Ae a vaai foi i le isi itu, o Moretekai na lavea'iina le tupu o Asueru mai faufauga leaga a ana lava auauna ina ia fasiotia le tupu. Pei o se tau'i lea mo Moretekai. A o ai foi na iloa, poo faufauga a Hamanu na aga'i uma ia Moretekai ma le tupu, pe a fua i lana fautuaga mulimuli. O mea e gata i le tupu a o lea fai mai e fai i le tagata ua finagalo le tupu e faaneeneina, ma lona manatu o ia lava.

E ui ina le mafai ona ofi atu se leo o Sa Iuta i pulega a le malo, ma le tupu o Asueru, ma le malaia na semanu a oo iai, a o lea lava ua auala atu ina ua fai Eseta ma masiofo, o se sili ona amanaia e le tupu nai lo soo se isi lava. Lea ua fai ma ala ua soloia ma lepetia ai le pa vaeloto na punitia ai lo latou ola sa'oloto.

O Sakaio, o se tagata inosia ma faasi'ugutua e tagata, ona o lana galuega, ma lona tulaga faa-aolafoga. E le leaga le galuega ua tofia iai, ae ua ala ona afaina, ona o le ala ua faatinoina ai le galuega. E pei foi ona aliali mai i nei aso. Toatele ua falepuipui ona o le faamaoni i le faatinoina o galuega, aemaise foi pe afai ua iai ni tulaga faaeaina i galuega, ona le iloa ai lea o le va fealoa'i ma le ava fatafata ma e oi lalo ifo. Pei foi la o le tulaga o Sakaio i lana galuega faa-aolafoga.

Ua leai a se leo o tagata e fai iai i le ala o loo faatino ai lana galuega, ona o le tamaloa, ua maualuga ma faaaloologia, ma o le sui foi o le Fale Pa'epa'e. O lona tulaga, e mai faauluuluga o le malo. Ua ia te ia foi le pule i auala e faatino ai lana galuega, e aunoa ma le aiaina e se tagata, aua e 'afu i le tulafono.

Le tulaga lena o Sakaio ua fai ma

pa pupuni, ua punitia ai le ola fiafia o tagata, ma ua foliga ai e tulaga ese o ia mai isi tagata. Ma atili fiafia ai lava lenei fitipupuu e 'ai ma inu, ma ola fiafia i le afu o tagata ona o lana galuega. Le afu lena o loo tausii ai lona aiga, ma faatino ai soo se mea e loto iai.

Ia, ae leai se mea e mafai, leaga o le kamaloa ei totonu o le saofa'iga e lote ai tulafono ma aumai ai faaiuga.

Ua oi tagata! Tiga le mativa, ae a sau lava le lafoga faa-Sakaio lava ia, e ave lava ona o le fefe i le tulafono. Na o na puupuu o Sakaio, ae umi ma maualuga le pa, o loo punitia ai le alofa i nai tagata oi lalo o lana pule faa-aolafoga a le malo.

Na fia vaai Sakaio ia Iesu, ona o ni tala aave mai i le tulaga ese ma le ofoofogia o mea na te faia. O lona avanoa lea, aua o lea ua aga'i mai i lona nuu, ma le mea e nofo ai. Masalo o ni lagona faapena, poo nisi foi mafuaaga, na faaosofia ai Sakaio e naunau fia vaai ia Iesu. Ua atili ai, aua o lona talitonuga, o le mafuaaga foi lea o lenei tumutumu o le motu o tagata, ua lolofi atu, ona o le fia vaai ia Iesu. Ua iloa e Sakaio, e faigata ona ia iloa atu Iesu, ona o lona faafitauli, o le puupuu, ae le tau foi lona faamoemoe, pe a le faia se isi laasaga, ona o le avanoa, o le mea e maua gata. E lei toe kea i tagata. Ua le vaai ifo foi i lona tagata tele, ma le maualalo o le tulaga ua na fai, o le a'e i le laau. Peitai ane, o le naunau fia vaai o Sakaio ia Iesu, na avea ma faitotoa i le soloia i lalo o le pa vaeloto sa punitia ai lana vaai atu i tagata sa pologa ona o ia. Sa punitia ai foi le vaai mai o tagata ia te ia. O le auala foi lea i le soloia o le pa vaeloto sa punitia ai lava lana vaai i lona faaolataga. E foliga mai foi, e mulia'i le fia vaai o Sakaio ia

Iesu, ae ua leva foi ona fia vaai ma fia feiloai le Alii ia Sakaio.

"Sakaio e, ia e vave ifo ia i lalo, aua e tatau ona ou nofo i lou fale i le aso." E mo'i a la na alu Iesu i le fale o Sakaio. A o le uiga loloto lea o lana fetalaiga ia Sakaio - o lona fale, o lona loto lea e fia nofo ai.

A lea! E le'i oo i le fale, a ua tu ma folafola i le Alii. - O le a ou vaeluaina atu a'u mea i e matitiva. Afai foi ua ou avea ni mea i se auala pepelo, (o le gaioi lava lea), o le a ou tau'i atu e ta'ifa.

O le a le fetalaiga a Iesu i lea mea? Ioe: "Ua oo mai le faaolataga i le aiga nei i le aso, ina ua fai o ia ma atalii o Aperaamo."

Ioe le au faitau, ma paaga a le Sulu Samoa, tainane uo ma aumeamamae o le Tala Lelei, le Ekalesia ma le fanau faatuatua a le Atua i lenei foi masina, tainane o lenei tausaga foi.

1.\*\*\* O se faamanatu taua tele foi lenei mo i tatou a o tatou galulue ai i tofi ma faiva ua tuu atu ma tuu mai e le Atua tatou te auauna ma galulue ai. 'Aua nei avea tulaga ma tofi ua faaeaina iai i tatou, e fai ma avanoa tatou te atiina ai ni pa pupuni, e noatia ai le saolotoga o isi uso a tagata, aemaise i latou oi lalo o la tatou ta'ita'iga.

2. \*\*\* Solo i lalo, talepe ma faaleaga nei loa le tele o pa ua tatou nonofo ma ati a'e, ua punitia ai le toatele mai manuia e tatau ona latou maua.

3. \*\*\* Tinea le fia pule ona o le malosi o tofiga ma le faaeaina i tulaga. Aveese le loto leaga ma le faasausili, le manatu faapito ma le vaai maualalo, tainane le ola faafiapoto ma le ola faamaualuga.

O le ala lea o le afio mai o Iesu,

# Faiva Alofilima o le Mataupu Silisili

Saunia e Faalepo A. Tuisuga  
Kolisi Faafaifeau i Malua

*mai le itulau muamua*

*“Ua ia ave foi le tusi o le feagaiga, ma na faitaulia i luma o le nuu; ona latou fai mai ai lea, o mea atoa uma ua fetalai mai ai le Alii matou te faia lava, ma faalogo iai.” - (Esoto 24:7)*

## 1. “Matou te faia lava ma faalogo iai.”

Ou te talitonu ua le o toe faanenefu i la outou silasila le faitau o leni vaega o le tusi o Esoto, e pei ona avea ma faitauga e faamamafa iai, mafaufauga faaleagaga o leni tusiga. I se faaupuga faigofie, o le vaega leni o le tusi o loo toe faamautuina ai le feagaiga a le Atua ma lona nuu o Isaraelu. O loo manino lelei ai le toe faatauaina o le ta'utinoga a Isaraelu i lo latou matua faia ma le toto'a o mea uma e faatonu mai e le Atua; aemaise o lo latou faalogo pea ma le usiusita'i i le fetalai mai o le Atua mo i latou.

O le a le tele se upu i le mataupu atoa leni o le tusi, ae ua fia faatauaina lava le tali atu a Isaraelu ia Mose, ina ua mae'a ona faitauina le tusi o le feagaiga e pei ona ta'ua i luga - “.....O mea atoa uma ua fetalai mai ai le Alii, *matou*

---

## O LE LAUGA

sei ona soloia ma lepeti i lalo pa vaeloto o loo punitia ai la tatou vaai atu i lana faaolataga. Sei soloia i lalo pa o loo ati e isi tagata ua punitia ai le ola saoloto o isi tagata, ina ia tusa ma lona finagalo.

“Aua ua sau le Atalii o le tagata e saili ma faaola i le na leiloa.”

Amene.

*te faia lava ma faalogo iai.”*

E tulaga ese leni fuaiupu mai le ta'otoga masani o le fesoota'iga i le va o le Atua ma lona nuu o Isaraelu. Ua mafai ona iloa iinei le fesuia'iga o le faaupuga - “*matou te faia lava, ma faalogo iai,*” mai le gasologa masani e faapea, “*matou te faalogo lava ma faia*”, pe a faapea foi, “*matou te faalogo lava ma usita'ia.*”

E iai le tusitusiga lauiloa o loo i le *Talmud* faa-Iutaia e faapea, na tauia tagata Isaraelu ina ua latou muamua “faia” ae mulimuli “faalogo”, ina ua latou faatino a o le'i matua malamalama. Ona faapaleina ai lea o tagata Isaraelu e agelu, e tofu le tagata ma pale e ta'ilua - o le pale mo le faatinoga/faia (doing) ma le pale o le faalogo (hearing).

O le fuaiupu lea ua faamamafaina nei, o se tasi leni o fuaitau e faamanatu pea (celebrated) i aga masani faa-Iutaia, talu ai o le tulaga ese o lona faata'otoga e pei ona iai i le Tusi Paia. O le faaupuga - “*Matou te faia lava*” (na'aseh) ua muamua lea nai le faaupuga, “*ma faalogo/usita'i*” (nishma). O le upu *nishma* e mafai ona faaliliuina o le ‘usita'i’ poo le ‘faalogo’. E faapena foi i le gagana Latina, o le upu *usita'i* e maua mai lona upu-autu *audire* e faaliliuina - ‘*ia faalogo*’.

Afai la o lea, o le a la le uiga mo i tatou o le faamuamua o le faaupuga, “*Matou te faia lava*” nai le faauuga, “*ma faalogo iai?*” Aua e pei ona ou ta'ua i luga, o le faiga masani lava e ave le faamuamua i le *faalogo* - ia lagona atu ma lagona ifo, ona mulia'i lea ona faia, faatino, galueaina, ma faagaoioi, se mataupu, se mafaufauga loloto,

poo se faamoemoe taua ina ua lagona lelei ma malamalama iai se tagata. Ou te manatu o se faasoa tulaga ese lea pe a fua i le aganuu faa-Isaraelu e faavae i le *Shema*, lea e iai le faaupuga masani: “*Isaraelu e, faalogologo mai ia...*”, ona sosoo mai ai lea ma le “.....Ia e alofa atu i le Alii lou Atua ma lou loto atoa, ma.....(Teuteronome 6: 4-5). A silasila la i le faasologa lena, e muamua le ‘faalogo’ i le Atua, ae mulimuli ona ‘faia’ o le “alofa atu i le Atua.”

O le *faiā* o le upu ‘faalogo’ ma le upu ‘faia’, o se mataupu taua tele mo le faiva alofilima o le mataupu silisili (practical theology). Aua ua auga e tasi ma le *faiā* o le upu ‘mafaufauga loloto’ (theory) ma lo latou ‘faatinoga’ (practice). O lona uiga, o le faaupuga faigofie lava o lea fesoota'iga e mafai ona faapea, ‘*ia faalogo ma faia*’ (to hear and to do). Afai la o le talitonuga lautele e tatau ona faamuamua ‘mafaufauga loloto’ ona faato'a mafai ai lea ona ‘faatino’, o lona uiga ua fememea'i nei le mafaufau o le tagata i leni fuaitau o le Tusi Paia, “*matou te faia lava ma faalogo iai*”. Aisea le fememea'i?

O le faamoemoe lea o leni pepa, ia sailiili toto'a i leni fememea'i ina ua faamuamua le **faia** (to do) nai lo le **faalogo** (to hear), poo le **faatino** (practice) e muamua i **mafaufauga loloto** (theory), **galuea'ina** (acting) e muamua i le **iloa-i le mafaufau** (knowing); ma se'i mata'itu poo le a se aoga ma se taua o lea fetuuna'iga o le fuaiupu mai le Tusi Paia, mo le mataupu silisili ma le galuega faafaifeau a le Ekalesia.

*faaaauu itulau e 12*

---

# IOANE KALAVINI

## O LE APOSETOLO A'OA'O ATU

**A ou mafaufau nei ou te le o toe iai i so'u lava malos, ou te ofoina atu lo'u ola ua fasia mo le taulaga i le Alii....e tuuina atu foi lo'u agaga ua fusia i filifili ma saisaitia i le ususita'i i le Atua.**

O nei upusii na faaaogaina e Ioane Kalavini i le tauafiafi o lona soifua ma lana misiona, ma e ou te manatu e fetau lelei lava ona faaata ai le tai su'efuefue, ma le vilivilita'i o uiga o lenei Tagata Toefuata'i iloga. E faamanino mai ai le ituaiga tagata o i tua atu o mea o le a folasia ma faalauiloa i itulau o le a faasolo mai o lenei tala.

### O le Aposetolo Toefuata'i

E ui lava e iai ona sese, ma o nisi o ona talitonuga faamataupu silisili o loo fesiligia pea e oo mai i le aso, ae na aliali manino mai ia Ioane Kalavini uiga o le Tagata Toefuata'i. Ua ta'ua o ia o se tasi o tagata Porotesano aupito iloga na soifua mai i le lalolagi. Fai mai foi nisi e sili atu ia i lo Matini Luteru.

Na ave e Kalavini mea moni na susu'ea ma maua e Luteru, ma ia faaaoga ia mea e si'a ai le afi o faaaliga fou mai le Upu Moni, i lalo o le ta'ita'iga a le Agaga.

E ui lava e tofu le "ta'ita'i'au" i lenei tusi (*God's Generals*), ma lona faasinoga mai le Atua, ae leai se isi o latou e pei o Kalavini na avea ma taupega o matagi poo le mata o le vilivilito o le tau i le toe fuata'iga o le Ekalesia. E le o se tagata e lelei sa na lafolafola i ana lauga e pei o isi. E le o se fai evagelia musaesae foi. Fai mai nisi, a na faapea o soifua mai i la tatou auga tupulaga, e ono avea o ia o se perofeta iloga. Peitai, ou te le talitonu iai.

Ou te talitonu o ia o se aposetolo faia'oga, o se tagata fai

mafaufauga toe fuata'i, ma o se tagata tusitusi, na ia susu'e i le malamalama o le la mea moni sa natia i le le malamalama o tagata, talitonuga faataulaitu, sauaga, ma talitonuga sese faale-lotu. A iai lava se mea e tatau ona manatua, ona aua lea ne'i galo o Kalavini na ia a'oa'o mai tatou ina ia aua lava ne'i o tatou fefefe e tutu i le Upu Moni, ma su'e a'e i luga measina oi totonu o i tatou ta'ito'atasi, ma tutu poupu i le mea moni mo le Atua i taimi uma ma i soo se mea. Tatou te tau'aveina le sulu pa'ia e tatau ona tatou toe maua, ma nofo i totonu o i tatou, ma tatou molimoli atu ia tatou auga tupulaga.

### O le Pagota o le Mea Moni A Prisoner of Truth

E tele tusitusiga ua faia e uiga i le soifua o Kalavini. O se tagata sa fevesia'i ai talitonuga o tagata. Sa matua alolofa ia te ia tagata sa talitonu i ona talitonuga. Ae sa matua inoino foi ia te ia i latou sa tetee, faapea ma i latou e su'esu'e i lona soifua i ona po nei.

A o le'i faaaauu la tatou su'esu'ega i le soifua o Kalavini, e tatau ona tatou saili pe aisea na ia galue ai faapea.

O Kalavini o se tagata e faigata ona uiga. O le toatele lava o i latou faaaposetolo e manatu le toatele e feulua'i ma fenunia'i o latou uiga ma le tutusa ma uiga masani o tagata. E le taumulimuli pe tosina gofie i le mea e o iai tagata, aemaise lava pe afai e sese le mea o aga'i iai. E le nofonofoa'i ma le ma gagana mai ina ia tausi ai pea le filemu. O tagata faaaposetolo e le ni tagata *tausifilemu*, pei o i latou ia e tia'i o latou talitonuga faavae faapea ma le mea moni ina ia faafiafiaina ai pea tagata. A o

tagata ia, e ta'u i latou o tagata *faatupufilemu*, e nofo sauni pea ma fiafia e faatino ni faiga e tatau ai ina ia tumau pea le mea moni. O lo latou lava manatu, e leai se filemu e maua pe afai o iai se mea sese. O le talitonuga o Kalavini, a faataligatuli i le mea sese, o se agasala lava lea.

O le aposetolo e mafaufau lava i lona ala. 'A 'e le maua le malamalama'aga, saili, ma saili faatasi ma le mea moni. E te maua loa, ola ai ma e tautala ai. A iai se sese, faasa'o, ma ia e faia loa ma soo se mea e tatau ai ina ia suia ai, ma e ola ai ina ia atoatoa ona faatino o le suiga ua fai.

O tagata faaaposetolo e matua naunauta'i i le upu moni; e le maluelue lo latou faamaoni i le Atua. Ona o ia la uiga faavae, ua manatu ai tagata e le malamalama, e ese lava o latou uiga, pe manatu faapito, pe a tetee atu ia i latou o faataute'e i lana upu moni. I le manatu lava o aposetolo e pei o Kalavini, o se mea aupito matuia i le lalolagi o le ola lea e le mulimuli i fuafuaga a le Atua. Ona o lea la loto mau i le Atua ma lona malo e le faamaluelueina, o lea sa tuua'ia ai i latou e faapea e le malamalama, e le tele so latou alofa, e le ni tagata fiafia foi.

A o le mea moni, e le tala feagai lea manatu. O aposetolo moni lava, o a tatou faufautua malolosi lava ia. E tatau ona tatou faafetai i le Atua ona o aposetolo e matua leai lava so latou fiafia i mea sese e faafenunia'i ai mea, ma le fiafia foi i agasala e faaleagaina le fua lelei mai o o tatou olaga. E tatau ona tatou malamalama o aposetolo e leai ma so latou fiafia pe a faalavelaveina le malo o le Atua i vaivaiga ma mea sese a tagata.

Ou te fesili atu ia te outou: O fea tatou te ono oo iai i nei aso, pe a na fai e manatu mama aposetolo i sese, ma uiga leaga, ma vaivaiga? Mata e mafai ona latou ausia le taunuuga o le galuega tele o le

*silasila itulau e 6*

---

# IOANE KALAVINI

## O LE APOSETOLO A'OA'O ATU

Toefuata'iga pe a na latou 'au'au faatasi ma faiga sa masani ai faapea ma le le malamalama?

### E le mafai e se mataupu e tasi ona faamatala uma

Ua fia selau ni tusi ua tusia e faamatalaina ai vaega eseese o le soifua o Kalavini, ae na o se mata'upu e tasi leni ua taumafai iai. Na o ni nai matati'a o le a ou taumafai e faamamafa i leni mataupu. O le sini o lo'u taumafai o le faamatala lea o ni tagata iloga mai o latou itu faa-tagata, o e na tuuina atu o latou ola i le usiusita'i i le valaau a le Atua. O le malamalama gofie ia o le valaauina o Kalavini, e aliali mai lea pe a suesue se tasi i lagona malolosi sa iai i lona loto.

Mulimuli ane, ona ou faaalua lea o nisi o talitonuga faa-mataupu silisili o Kalavini. Ou te le manatu e fai ni faaaliga o finagalo e uiga i ona talitonuga, ae fia faaalua le agaga na ia toe fuata'i ai le tino o Keriso. 'A 'e fia suesueina Kalavini i le tulaga faa-mataupu silisili, ia, e selau ma selau tusi ua uma ona tusia i senituri e tele ua mavae, e mafai ona a'oa'oina ai oe e uiga i lea mataupu.

### Na fanau i aiga tamalii

O Noioni (Noyon) o se nuu laitiiti ae taua tele, e tusa ma le 65 maila i matu sasa'e o Paris, Farani. O le nuu lea i le taeao o le taumafanafana o le aso 10 Iulai 1509, na fanau ai lona fa o le fanau a Serate ma lana ava o Tini, o le tama na la faaigoa ia Ioane.

O le tausaga na fanau ai Kalavini, o le vai taimi lea ua fe'avea'i ai tala e matagi i le atunuu atoa o Farani, e uiga i se Toefuata'iga fou (Reformation). O le ta'ita'i o lea Toefuata'iga, o le tagata Siamani e igoa ia Matini

---

**Na ta'ua o ia o se tasi o Porotesano aupito iloga na soifua mai i le lalolagi, e leai lava se tasi e pei o Kalavini na pei o se asiosio lona malosi i le toe fuata'iga o le Ekalesia.**

---

Luteru, ua maua sona faailoga BA i mataupu tau i le Tusi Paia, ma o loo ia faia ni ana a'oa'oga i le Iunivesite e uiga i le maua o le faaolataga e ala i le mafutaga ma le Atua.

E lelei lava le olaga tamaitiiti o Ioane Kalavini i se aiga lelei. E ui lava e le tamaoaiaga tele lona aiga, a o lona tina o le afafine o se pule o se faletalimalo, a o lona tama e lelei lana galuega, o le fesoasoani lea i le faiga o pepa faale-tulafono a faifeau ma loaia, e

fesoasoani ai i tagata. O lea galuega na ia masani ai i mea tau tulafono, ma oo ina avea ai ma loaia mo le aulotu, ma failautusi mo le epikopo, na ia vaaia ai mea tau tupe a le epikopo.

E laitiiti lava ni faamatalaga e uiga i le tina o Kalavini. Ae iai tala fai mai, e matua aulelei lava le tina, ma to'aga i lotu. Sa ia avea foi Kalavini ma faamatamata i faatagata o tagata pa'ia, lea e manatua pea e le tina na sogi ai Ioane i le muaulu o le faatagata.

Na oo ina maluu le tina ina ua to'alima lana fanau, (e to'alua na feoti) a o na o le tolu tausaga o Ioane Kalavini. Na toe fai le tolu o Serate, ae leai ni faamatalaga o maua e uiga i le tina seeane (stepmother) o Ioane, tasi lava le mea o maua, na maua sa na fanau teine e tolu, o le tasi o i la'ua ia sa nonofo faatasi ma Ioane ina ua matua, i vai taimi ua ta'uta'ua ai Ioane.

Ona o le tulaga lelei sa iai lona tama i le nuu, o lea sa militino ai Ioane ma tagata o aiga tamalii ma maumea. Sa a'oa'oina foi o ia e ni faiaoga i lona lava aiga, ma oo ina ulufale atu ai i se aoga faapitoa i Noioni.

---

## O le Ola i Luga o le Fata Faitaulaga

"Ia e aauina lou malamalama ma lau upu moni, ia la ta'ita'i mai ia te au, ia la faaoo ia te au i lou mauga paia ma lou malumalu. Ona ou alu atu ai lea i le fata faitaulaga o le Atua, o le Atua ou te matua fialia i ai; le Atua e, lo'u Atua ou te vivii atu ia te oe i le kitara." - Salamo 43: 3-4.

E le taumate o se tagavai, poo se faailoga aupito sili ona fetui e faailoga ai le soifua o Aperamo, o le fata faitaulaga.

E manino lava ni mea se fa na tutupu, i ni vaega eseese o lona maumausolo, na ia tali atu ai i le Atua i lona fausia lea o se fata faitaulaga, poo se mea ua fai faapitoa e osi ai lana taulaga i le Atua.

Muamua o Sekema: Kenese 12:

7: "Ua faaali mai le Alii ia Aperamo, ma ua faapea mai, ou te foaiina atu leni lava nuu mo lau fanau, ona faia lea e ia i lea mea o le fata faitaulaga i le Alii....."

Toe fai foi i le va o Peteli ma Ai: "Ua tuua foi e ia lea mea, ae alu atu i le mauga i le itu i sasae o Peteli, ma faatu ai lona fale'ie, e i lona itu i sisifo o Peteli, ae i lona itu i sasae o Ai; ua ia faia foi le fata faitaulaga i le Alii i lea mea, ma ua valaau atu i le suafa o le Alii." Kenese 12:8.

Toe fai foi i Heperona: "Ona ave lea e Aperamo lona fale'ie, ua alu atu ua mau i aluna o Mamere, oi Heperona lea, ua ia faia foi i lea mea le fata faitaulaga i le Alii." Kenese 13:18. (aluna: laueleele

---

# O le Mafuaaga o le Pese: ALL GLORY LAUD AND HONOUR

O le taeao ua faalogo ai e le motu o tagata ua o mai i le tausamiga, ua maliu mai Iesu i Ierusalem, ona ave lea e i latou o lau o pama, ma o mai e faafetaia'i ia te ia; ona latou alalaga lea, "Osana! Ia manuia le afio mai i le suafa o le Alii, o le Tupu o Isaraelu!"

O le solo o le manumalo na amata ina ua fo'i mai le ausoo ma le asini. (Luka 19:30). Na matua mulimuli ma usita'i le ausoo i le faatonuga na tuuina atu e le Alii, ma le tali e fai atu pe a fesili se isi pe o fea a ave iai le asini. I nei aso, e tatau foi ona faapea ona tatou usiusita'i i faatonuga mai le Alii, ma tatou mulimuli tonu ai, ona manuia ai lea o la tatou auaunaga i lo tatou Alii.

E a'oa'o mai foi le solo o le Aso

Sa o Laupama, o loo ta'ita'i pea lo tatou Alii i mea tatou te fai pe afai tatou te faalogo ma usiusita'i i lo tatou Alii. O lo tatou tiute o lo tatou mulimulita'i lea ia te ia ma le faamaoni, ma faasilisiliina o ia i mea uma tatou te faia.

O le pese lenei o le Aso Sa o Laupama (All Glory Laud and Honour), na tusia i le tausaga e 820 talu ona fanau mai o Iesu, e le epikopo o Theodolph o Orleans (Fiotofi o Olini), i Falani, a o falepuipui o ia i le monaserei o Angers. Sa lauiloa Fiotofi o se tagata tusi solo, faifeau, o ia foi o le epikopo o Olini. Ina ua maliu le emeperoa o Charlemagne (Salemene) i le tausaga e 814, ona faafalepuipui ai lea o Fiotofi e le atalii o Salemene lea na soloa'i ane i le nofoalii, o Lui, ona fai mai na faufau Fiotofi na te foua le tupu.

---

## O le Ola i Luga o le Fata Faitaulaga

laugatasi). O le faia e Aperamo o nei fata faitaulaga, o ni faailoga manino ia o le tuuina atu atoatoa o lona tagata i le Atua, i le faatuatua.

Na ia toe fau foi se isi fata faitaulaga i le mauga o Moria, lea na ia faalogo ai ma usitai i faatonuga a le Atua, ma ia tuuina ai i luga o le fata faitaulaga lona lava atalii. O le faailoga lea o le tuuina atu uma o ia, ma mea uma e sili ma taua ia te ia, i le Alii lona Atua, i le faatuatua ma talitonu.

O se ata foi lea o le satauro ma le tuugamau, na toe tu mai ai le Alii Faaola. Ua maea le tofotofoga o Aperamo i le fata faitaulaga ma lona atalii ua tuu ai i luga, ua pasi ma ua talia le taulaga. Na silafia lelei e le Atua, ina ua tuuina e Aperamo lona atalii i luga o fafie o le a osi le taulaga i

lona atalii, ua sauni le naifi, ua ta'oto lona atalii, ua sii lona lima o le a tutu'i ifo i le fatu o lona atalii, le atalii ua leva ona folafola mai, na silafia lelei e le Atua, o Aperamo lava lea ua i luga o le fata faitaulaga. O ia atoatoa, ma mea uma o ia te ia, e la le Atua, ma ua tuuina atu uma i le Atua.

E faapea foi i Kolokota, ua pasi le taulaga mo agasala, ua tuufua le tuugamau, ua toe tu mai le Alii Faaola i le manumalo.

O fata faitaulaga uma na faia e Aperamo a o lei oo mai i le mauga o Moria, o le sauniuniga lava lea o ia mo le tofotofoga aupito sili ona faigata o lona faatuatua, o le tuuina atu lea o lona atalii e osi ai le taulaga.

O lo tatou ola, o le ola tapu'eina e le Atua, ina ia tatou malolosi, ma

E iai le talatuu lauiloa e uiga i lenei pese e faapea, e talitonu le toatele o tagata, ina ua latalata ina oti le epikopo i le tausaga e 821, na asiasi atu ai le tupu o Lui i le vaega o le aai lea e falepuipui ai Fiotofi, ma ui atu i tafatafa o le fale o iai Fiotofi. Ae fai mai o le taimi lea o fai le lotu a Epikopo Fiotofi ma pese. Ina ua faalogo atu iai le tupu o Lui o pese mai e Fiotofi le pese lenei, na oo ifo i ona lagona uiga o upu o lenei pese, ma oo ina ia faatonuina ai ina ia tatala Epikopo Fiotofi mai le falepuipui.

All glory, laud and honor, to  
Thee Redeemer King,  
To whom the lips of children  
made sweet hosannas ring.  
Thou art the King of Israel,  
Thou David's royal Son,  
Who in the Lord's name comest,  
the King and blessed One!

The company of angels are  
praising Thee on high,  
And mortal men and all things  
created make reply:  
The people of the Hebrews with  
palms before Thee went;  
Our praise and prayer and  
anthems before Thee we  
present.

To Thee before the passion,  
they sang their hymns of praise;  
To Thee now high exalted, our  
melody we raise:  
Thou didst accept their praises-  
accept the praise we bring,  
Who in all good delightest,  
Thou good and gracious King!

---

## O le Ola i Luga o le Fata Faitaulaga

mafai ona tatou tutu poupou e faafesaga'i ma le fili, ma tatou manumalo mai ai. Ae viiia ai lo tatou Atua.

# FA'ASOLOGA FONO TELE 2015

## MALUA, ASO 11 - 22 ME

"FA'AMAGALOINA, FA'AMALOLOINA, FA'AFUOINA"  
*Forgiveness, Healed, Renewed*  
*(Tatalo a le Telona)*

<b>ASO</b>	<b>TAIMI</b>	<b>KOMITI &amp; SAUNIGA</b>	<b>NOFOAGA</b>
<b>ASO GAFUA</b> <b>11/05/15</b>	10.00am	Komiti Fa'atonu	Fale Mafutaga
	7.00am	Asiasiga Komiti o Atina'e	Atina'e
	1.00pm	Fono Komiti o Atina'e	Fale Senetenari
	7.00pm	Lotu Talosaga Au Toeaina <b>Ta'ita'i: Kereta Fuafiva FT</b>	Fale o Tina <b>Falealili Sisifo</b>
<b>ASO LUA</b> <b>12/05/15</b>	8.00am	Komiti Au Toea'ina Komiti o A'oga	Fale Mafutaga Fale Senetenari
	9.00am	Faletua Au Toea'ina	Fale o Tina
	7.00pm	Komiti Fa'amisionare	Fale Mafutaga
<b>ASO LULU</b> <b>13/05/15</b>	8.00am	Komiti o Fe'au Ese'ese Komiti Au Taumafai	Fale Senetenari Fale Mafutaga
	9.00am	TPT: Tautua Puapuaga o Tagata	Fale o Tina
	2.00pm	Komiti o Fe'au Ese'ese	Fale Senetenari
	7.00pm	Lotu Au Taumafai <b>Ta'ita'i: Moe Tauti FS</b>	Fale o Tina <b>Vitoria</b>
<b>ASO TOFI</b> <b>14/05/15</b>	8.00am	Komiti o Tupe Komiti Au Leoleo	Fale Senetenari Fale Mafutaga
	9.00am	Lotu Mafutaga Tina	Fale o Tina
	1.30pm	TPT: Teine Papauta Tuai	Fale o Tina
	7.00pm	Lotu o Nu'u Ese <b>Ta'ita'i: Avele Utumapu FS</b>	Fale o Tina <b>A'ana</b>
<b>ASO FARAILE</b> <b>15/05/15</b>	5.00am	Lotu Au Leoleo <b>Ta'ita'i: Palemia Tauiliili FS</b>	Fale o Tina <b>Ituotane</b>
	9.00am	Fono Mafutaga Tina	Fale o Tina
	2.00pm	Komiti o Tupe	Fale Senetenari
	7.00pm	Komiti o Tupe Fono Malua Tuai	Fale Senetenari Fale Mafutaga
<b>ASO TOONAI</b> <b>16/05/15</b>	9.00am	<b>SAUNIGA O LE FA'AU'UGA</b>	Fale o Tina
		<b>Ta'ita'i: Tavita Taulealo FT</b>	<b>Manukau</b>
		<b>Faitau Tusi Pa'ia: Iosefa Uilelea FT</b>	<b>L-L-Aleipata</b>
		<b>Tatalo: Amuia Seuala FT</b>	<b>Ituotane</b>
		<b>Fa'ae'elima: Toese P. Toailoa FT</b>	<b>Tait'aifono KAT</b>
		<b>Tavita Taulealo FT</b>	<b>Manukau</b>
		<b>Tavita Roma FT</b>	<b>Fa'asaleleaga</b>
		<b>Aviti Etuale FT</b>	<b>Vitoria</b>
		<b>Eti Tamati FT</b>	<b>Malua</b>
		<b>Tautiaga Senara FT</b>	<b>A'ana</b>
	<b>Tu'uina atu o A'oa'o mo le Fa'au'uga</b>		
	<b>Kerisiano Soti FT - Failautusi KAT</b>		
2.00pm	Lotu mo Tupulaga <b>T'aita'i: Aufaga Fa'afia FT</b>	Fale o Tina <b>Niu Sila i Saute</b>	
7.00pm	TUFA FAILA A USUFONO	Fale Fono	
<b>ASO SA</b> <b>17/05/15</b>	9.00am	LOTU TAEAO/FA'AMANATUGA <b>Ta'ita'i: Toese Peleti Toailoa FT</b>	Fale Fono <b>Niusaelese</b>
		LOTU TAEAO/FA'AMANATUGA <b>T'aita'i: Makerusa Pototesano FT</b>	Fale o Tina <b>(Amerika)</b>
	6.00pm	LOTU AFIAFI <b>Ta'ita'i: Titi Eteuati FS</b>	Fale Fono <b>Fa'asaleleaga</b>



**18 - 22, USUIA LE FONOTELE**

<b>ASO GAFUA</b> <b>18/05/15</b>	7.45am	Tapua'iga Amata <b>Ta'ita'i: Tautiaga Senara FT (Ta'ita'ifono)</b>
	8.00am	<b>Pepa: Makes Ne'emias FS (Kolisi Fa'afai'feau Malua)</b>
	9.00am	Amata Taulumaga o le Fono Tele.
	12.00pm	Malologa mo Taumafataga o le Aoauli.
	2.30pm	Fa'aaau Taulumaga o le Fono.
	5.30pm	Malolo le Fono
	7.30pm	<b>Polokalame Fa'alauiloa – Land &amp; Transport Authority</b>
<b>ASO LUA</b> <b>19/05/15</b>	7.45am	Tapua'iga Amata <b>Ta'ita'i: Toese Peleti Toailoa FT (Penisione)</b>
	8.00am	<b>Pepa: Liki Tiatia FT (Au Toeaina)</b>
	9.00am	Taulumaga o le Fono Tele.
	12.00pm	Malologa mo Taumafataga o le aoauli.
	2.30pm	Fa'aaau Taulumaga o le Fono
	5.30pm	Malolo le Fono
	7.30pm	<b>Pesepesega/Siva Fa'a-le-Agaga –</b> <b>1. Autalavou EFKS Vaitele-uta</b> <b>2. Samoa Victim Support Group</b> <b>3. Autalavou EFKS Saoluafata</b>
<b>ASO LULU</b> <b>20/05/15</b>	7.45am	Tapua'iga Amata <b>Ta'ita'i: Lale Ieremia FT (Penisione)</b>
	8.00am	<b>Pepa: (Mafutaga Tina)</b>
	9.00am	Taulumaga o le Fono Tele
	11.00am	<b>SAUNIGA ALOA'IA AU PENISIONE (Fale Fono)</b>
		<b>Ta'ita'i: Tautiaga Senara FT (T'aita'ifono)</b>
	2.30pm	Fa'aaau Taulumaga o le Fono.
	5.30pm	Malolo le Fono.
	7.30pm	<b>Tifaga – Tala Fa'asolopito o le Ekalesia</b>
<b>ASO TOFI</b> <b>21/05/15</b>	7.45am	Tapua'iga Amata <b>Ta'ita'i: Senetenari Iupeli FT (Penisione)</b>
		<b>Pepa: Manu'alesagalele Enokati TT (Falealili i Sisifo)</b>
	8.00am	
	9.00am	Taulumaga o le Fono Tele
	12.00pm	Malolo mo Taumafataga o le aoauli
	2.30pm	Fa'aaau taulumaga o le Fono
	5.30pm	Malolo le Fono
	7.30pm	<b>Feiloa'iga Au Toea'ina &amp; Aufaigaluega Faife'au</b>
<b>ASO FARAILE</b> <b>22/05/15</b>	7.45am	Tapua'iga Amata <b>Ta'ita'i: Tautiaga Senara FT (Ta'ita'ifono)</b>
	8.00am	<b>Pepa: Tupulaga Talavou (Niu Sila i Saute)</b>
	9.00am	Amata Taulumaga o le Fono Tele.

**TAUALUMAGA O LE FA'ASOLOGA O LE FONOTELE:**

- 1 Fa'amaonia I'ugafono Fono Tele
- 2 Mau Tu'u Sa'o mai Matagaluega
- 3 Mau Tu'u Sa'o mai Komiti Tetele e Ono a le Ekalesia
- 4 Fa'amaonia Galuega a Komiti
  - i. Komiti o Tupe
  - ii. Komiti o Fe'au Ese'ese
  - iii. Komiti o A'oga
  - iv. Komiti o Atiina'e
  - v. Komiti Fa'amisionare
  - vi. Komiti Au Toea'ina
- 6 Palota Failautusi Aoao
- 7 Palota Sui Ta'ita'ifono

**FAILAUTUSIAOAO**

---

## *A Page for Youth*

### **ITULAU MO TUPULAGA TALAVOU**

---

#### *O Se Tala Mo Ulugalii Talavou fia fai Pisinisi*

# **“Ua le Manuia? Leai! Ua na’o ni nai Fa’ava’atu’ia.”**

‘A ‘e sau i le aso lenei e te asiasi mai ia te a’u i lo’u ofisa i Kalefonia, o le a e silasila iai i se seti, o se paipa ua fauina i se tulaga e fai i maamora o loo tuu mai i le isi pito o lo’u ofisa. O loo si’osi’oina lea paipa e ni nofoa se iva e fai o latou faamalu. O le ‘a ‘e fesili pe aisea ua faatu ai i totonu o lo’u ofisa lea paipa, ae leai se vai o ta’i mai iai. Peitai o ia nofoa e iva pe ana mafai ona tautala mai, e te ofo i se latou faamatalaga e fai mai, e uiga i le aso na toetoe lava a ou faavaivai ai, ona ua leai so’u faamoemoe o toetoe.

O le taimi o le leaga o le tamao’aiga o le lalolagi ina ua ola le Taua Tele Lonalua a le Lalolagi - 1939-1945. Ua su’e gata galuega. O si o’u to’alua o Popi, ua alu ua faatau si tama’i pisinisi ta’ofu i se tupe na ia aitalafuina. E to’alua si a ma fanau, o lo matou fale, o le taavale, faaopoopo atu iai ma isi aitalafu laiti masani tau le aiga. O’o loa ina tupu le faalavelave - ua matua leai lava ma se tupe o toetoe e togitogi ai ta’i masina le aitalafu o le fale, atoa ma isi mea.

Na ou manatu, e leai ni a’u taleni, leai ni a’u a’oga tau i ni galuega, ou te le’i a’oga fo’i i se kolisi. Ae na ou manatua se tagata i tausaga ua te’a na ia fai mai e iai se taleni oi ia te a’u. O lo’u faia’oga i le Igilisi i le a’oga maualuga. O ia na u’una’ia a’u ina ia ou aveina le

galuega faatusitala mo nusipepa. Na ia tofia fo’i a’u o le pule o faasalalauga faapisinisi i le nusipepa a le a’oga, ma ou tusia tala autu mo le pepa. Na ou mafaufau, a mafai ona ou tusia se “Fesoasoani mo Tagata Faatau” mo le nusipepa i le matou nuu, e le taumate e lava se tupe e maua mai ai e togitogi ai le aitalafu o lo matou fale.

E leai sa’u taavale e leai foi sa’u tausitama. Na o le taavale e ave ai la’u tama (pram), lea na’o le mamulu ese lava o lona uili. Ua ou taumafai lava ina ia ‘aua ne’i aveina lo matou fale e le kamupani na aitalafu mai ai le tupe, pei ona tupu i le fale o o’u matou a o o’u laitiiti. Ou te mana’o ina ia ola a’e la’u fanau i se fale sa’oloto e leai se aitalafu.

Peitai ou te alu atu i le ofisa o le nusipepa, e leai se galuega o avanoa. Ua matua leaga lava le tamao’aiga. Oso mai loa i lo’u mafaufau, ua ou fesili pe mafai ona ou faatauina ni vaega o le pepa e faasalalau ai ni a’u faatosina mo tagata faatau. Na talia la’u talosaga, ae i ni aso mulimuli ane, na fai mai ai ia te a’u tagata o lea ofisa, na iai lo latou manatu, e le umi lava ae ou musu i le galuega. Peitai na sese i latou ia, ona latou te le iloa lelei lo’u tagata.

A o se aso timu na ou alu ai e ao mai faasalalauga a pisinisi na ofo

mai, ae fai mai ua sui o latou manatu. Ua le manana’o e faasalalau ia te a’u ona e le o aumaia se faasalalauga mai le peresitene o le ‘au faapisinisi ou te faia, o le alii lea o Rupeni Alameni e iai sona faletalavai. O le faletalavai lea e aupito alumia i lo matou nuu. E matua faatuatuaina lava e pisinisi le tagata lea.

Toetoe ina a pe lo’u fatu. O faasalalauga faapisinisi ia na ou maua, e matua lava ai lava le totogi o lo matou fale mo lenei masina. Ae na toe oso mai i lo’u mafaufau, e sili ona ou alu e feiloa’i ia Alameni. E alolofa tele ma amana’ia e tagata le alii lea o Alameni. Ou te lagona lava na te talia lelei a’u. Peitai o taimi uma lava sa ou taumafai ai e feiloai ia te ia i aso ua te’a, e le talia lava a’u. Ae na ou talitonu, a aumai ana faasalalauga ou te faia, o le mea moni lava e amata gasolo mai ai isi pisinisi tetele ia te a’u.

Ou te savali atu i lona faletalavai o tu mai i le laulau faatau. Na vave lava ona ou fai atu, “Lau Susuga Alameni, e matua talitonu uma tagata ia te oe. A mafai lava ona fai mai sou manatu i a’u pepa ia, ona ou alu ai lea ma faafesoota’i isi pisinisi ma maua ai ni a’u fo’i pisinisi.”

E leai ma se upu na fai mai ae na o le lulu o lona ulu. Na pei ua pa’u lo’u fatu ma patato i le fola o le fale, ma e na lagona uma mai e tagata le patato o lo’u fatu.

Pei o le a le fofo’e atu o lo’u fiafia. Na ou oo atu i le paipa teuteu manaia e fai i maamora i lumafale o le faletalavai, ma ou te faalogo atu e matua le lava lava so’u malosi ou te ave ai la’u taavale i lo matou fale. Ou te le’i mana’o ou te nofonono i nofoa o le paipa e aunoa ma sa’u mea e faatau, o lea na ou tago ifo ai ua to a’e le tupe lava e tasi na toetoe, ma faatau ai sa’u coke. Ua ou le iloa se mea a fai. Talofa i si a’u fanau ai foi o le a toe ave lo matou fale ona e le’i totogia le tupe o le

---

*A Page for Youth*  
**ITULAU MO TUPULAGA TALAVOU**

---

# “Ua le Manuia? Leai! Ua na’o ni nai Fa’ava’atu’ia.”

masina, pei foi ona fai i le fale o o’u matua a o o’u laitiiti. Pei lava e sese lo’u faia’oga tusitala. Ua amata maligi nei o’u loimata.

Ae te’i ua ou faalogoina se leo itiiti i o’u tafatafa. “O le a le mea ua tupu ia oe, tama’ita’i?” Na ou ea a’e i luga ma ou iloa atu ai ni foliga popole o se loomatua aulelei ulusina. Na ou sasaa atu iai o’u mafatiaga, ma faai’u la’u tala i lo’u fai atu, “Ae le fia vaai Rupeni Alameni i a’u galuega.”

“Se’i aumai se’i o’u vaai iai.” Na faitau atoa e le loomatua mata alofa la’u tala atoa faatosina mo pisinisi, e fuafua e lolomiina i

nusipepa. Pei o le a le tu sa’o a’e i luga o le loomatua, vaai atu i totonu i le mea o iai le pule o le faletalavai, ma valaau i se leo matua leo tele lava ma le ita. “Rupeni Alameni, sau iinei!” O le loomatua, o le faletua o Rupeni Alameni. Na ‘ote le loomatua ma faatonu Rupeni e lolomi uma mea ia na ou alu atu ma a’u. Na tago atu i le telefoni ma telefoni pisinisi uma ia na latou teena a’u tala, ma faatonu e talia uma a’u faatosina mo pisinisi. “Alu la’ia e ao mai au siaki mai pisinisi la, ma le faletalavai.”

Na avea mulimuli ane Viviane

ma Rupeni Alameni ma a ma uo mamae. E le taumate ana ou fesilisili i nisi tagata fai pisinisi i le aai, e le taumate latou te faatonu mai a’u, ou te talanoa ia Viviane, ona o ia lena o le posi o le aiga o le ‘au Alameni. I mea tau pisinisi, e posi foi i lana tane.

O ina lava i le paipa fola i maamora na amata manuia ai la’u pisinisi. Ua fa ofisa i le aai, 285 tagata faigaluega, 4000 kamupani e aumai a latou galuega ia matou. Ina ua faafou e Alameni le faletalavai tuai, ma sii ese le paipa maamora lea na ou nofonofo ai, ona alu atu lea o si o’u to’alua o Popi ua faatau mai, ma tuu i lo’u ofisa. ‘A ‘e asiasi mai i lo’u ofisa i Kalefonia, e oo ina ta nofonofo i le paipa maamora ma inu ai se ta Coke. Ma manatua, ‘aua lava ne’i e faavaivai tusa lava poo a ni faigata e faamalumalu mai. Ma manatua upu nei a Dottie Walters:

“Ua le Manuia? Leai! Ua na’o ni nai Fa’ava’atu’ia!”

tusia e Dottie Walters

faamatalaina e

Afemata T. Apelu Aiavao

---

## Ia Mauualalalo ni o Tatou A’a

*mai le itulau muamua*

taimi uma lava ou te vaai iai, o ofu sona ofuvae kaki ‘u’umi, e fai fo’i ma lona pulou taumata lanumoana. E ‘ata’ata lava ia ma foliga fiafia. E le ‘ote fo’i ia matou tamaiti pe a matou ta’a’alo i ona lumafale. Sa iai lava lo’u masalosologa e fiafia atu Dr. Gibbs i lo le mea e tatau ona iai ona o le tulaga o ona manuia faale-lalolagi.

A le pisi Dr. Gibbs i le faamaloloina ma faaolaina tagata, o le isi ana galuega matua e fai pea i lea aso ma lea aso, o le totoina o laau i lona fanua e sefulu eka le tele, ma lona faamoemoe, ia avea ma vaomatua, poo se pavao e ola ai ni laau tetele se tele.

E ese lava talitonuga o Dr. Gibbs e uiga i laau na te totoina. Fai mai a ia, a le tigaina laau, e le ola lelei. E matua le fuiina lava i ni vai laau fou e toto e Dr. Gibbs, pei ona tatou faia e tatou pe a totoina ni a tatou laau i o tatou togalaau. Fai mai a ia, e matananana ai laau pe a fuivai. Na ou fesili iai i le isi aso pe aisea e le fuivai ai ona laau, ae fai mai, e faama’ima’ia ma faalautagitagi ai laau, ma le ola malolosi, a tutupu mai ai la nisi laau, e tutupu a’e ua le malolosi aua sa faamatananana laau na tutupu mai ai. E tatau ona e faia ni mea e ti’a’i ai o latou tino ma ola lelei ai.

Na ia faamatala foi, a fui laau, ona le mauualalo lea o o latou a’a, aua

o lea e maua i luga le latou mea’ai, ona le malolosi ai lava lea aua e le galulue e tau su’e mai ni a latou mea’ai i lalo i le manava o le elelee. A mauualalalo fo’i a’a o le laau, o se fesoasoani tele lava lea i le laau pe a oo i aso matagi ma afa.

Pe tusa o le lua tausaga talu ona ou tuua lo’u aiga ae maliu Dr. Gibbs. O aso uma lava ou te ui atu ai i luma o lona fale, ou te matamata ai i laau na ia totoina ua tusa nei o le 25 tausaga ua te’a. E matua malolosi lava laau!

Pe tusa o le tolu tausaga talu ai na ou totoina ai ni laau. I le tau mafanafana atoa na ou fuivaiina ai. Faapelepele ma tausi lelei. Ae ua  
*faaauau itulau e 12*

---

# Faiva Alofilima o le Mataupu Silisili

*mai le itulau e 4*

2. E Saogalemu le Iloa i le Mafaufau (*the Security of Knowing*)

Fai mai le lafoga a se tasi tagata iloga i le su'esu'eina o le Mataupu Silisili: "O soo se tofa manino lava e saili i le mea moni." (Every philosophy seeks truth). A o lena sailiga e mana'omia lo tatou laasia o se isi si'osi'omaga o mafaufauga e ese mai nai lo tatou si'osi'omaga faale-mafaufau masani - poo le saili i le mea moni e le iloa e se tasi (unknown truth). Aua afai ua tatou maua le mea moni, e leai se uiga o lo tatou saga saili pea iai. O lona uiga la o la tatou sailiga ia maua le mea moni, o lo tatou laasia lea o fafo atu o i tatou lava, agai i le mea moni e ese mai i le mea moni ua tatou iloa. E lima ta'ita'iina i tatou e le naunau e saili faale-mafaufau, tusa lava pe le mafai ona tatou maua atoatoa lena mea moni (truth) ona e sili atu nai lo i tatou lava ma lo tatou iloa.

E le gata ina tatou naunau e 'saili' ia maua le mea moni, ae taua foi lo tatou 'iloaina' o le mea moni (to know the truth). O lona uiga

afai tatou te maua ma iloa le mea moni, e tele le avanoa e faaososoina ai i tatou, ia tatou 'onaina' (to possess) le meamoni pe a o tatou maua. Ae peisea'i o le natura masani lea o le tagata soo se mea lelei, mea fou manaia, mata'utia, ma ofoofogia, e naunau lava e fai mana.

I se isi faaupuga, o le sailiga o le mea moni o le a le toe laasia fafo atu o le tagata lava ia i se tulaga faigata ma le lautele, a ua avea nei ma sailiga i le lotoifale faale-mafaufau o le tagata lava ia, ina ua ia maua, iloa, ma onaina lena mea moni. O lona uiga o le 'mea moni' ua avea nei ma mea totino a le tagata i le tulaga e le toe popole ai aua ua *saogalemu mea uma i lona lava iloa ma lana faatofala'iga*. O le iloa lea ua avea nei ma iloa-i-le-mafaufau o le tagata lava ia (self knowledge). A o le tulaga faigata lea o le gasologa o le tofa manino faale-tagata e pei foi ona finauina e nisi o tagatasu'esu'e o le mataupu silisili, pe a taumafai le tagata e ta-aofa'i faatasi le meamoni ma aputiputi e tusa o lona lava mana'o.

O lona uiga o lo tatou iloa i le mafaufau (self knowledge), tatou te maua ai le to'amalie ma le saogalemu faale-mafaufau i taimi uma o lo tatou ola. Tatou te faamemelo i lo tatou atamai lena, aua na te faailoa mautinoa mai ia i tatou le uiga o lo tatou ola mai le Atua.

Ae peitai o i tatou o tagata e le na ona mafaufau loloto i le uiga o mea o lenei ola, ae tatou te faatino foi ma galuea'ina mea ua tatou mafaufau iai. O le olaga la, e le na ona iloilo toto'a i le mafaufau ina ia malamalama i lona uiga, a o se mea taua e ao ona 'olaina' e le tagata i le atoatoa o lona malosi ma le silafia. A silasila la i le fuaiupu mai le Tusi Paia, lea o fai ma 'auga o lenei pepa, ("matou te faia lava ma faalogo iai") e foliga mai o loo sagatonu lava ina ua faamuamua le *faatinoa* (acting) o se mea, nai lo le muamua *iloi-i-le mafaufau* (knowing) o lena mea.

Ui i lea, e faaososoina pea le mafaufau o le tagata e tatau lava ona faaoga le auala saogalemu e pei ona ou ta'ua, o le malamalama muamua lea i se mataupu, ona faato'a faatino ai lea. Aua a faatino ma le mautinoa se feau, se galuega, se fesoasoani poo soo se mea lava, *faaauau itulau e sosoo ai*

---

## Ia Maualalalo ni o Tatou A'a

avea lea ma mea e pei e faamoemoe mai ai laau ia a'u ou te alu atu ma ni o latou vai i afiafi uma, a ua le galulue latou ma o i lalo o latou a'a e saili mai ni o latou vai. Ua ola faalagolago tele ma paie.

O le mea malie la i laau a Dr. Gibbs, o lo latou tigaina ma fia feinu i le tele o aso, ua avea ma mea e malolosi ai, e sili atu i lo se mea na maua e a'u laau i lo'u fui faalausosoo i aso uma.

O po uma lava ae ou te le'i moe, ou te alu ai i le potu o la'u fanau

tama e to'alua, e vaai poo lelei o la moega ma 'a'afu lelei. Ma ou tatalo mo la'ua. Ma ou tatalo foi ina ia saogalemu o la olaga pe a matutua. "Le Alii e, ia mamao si a'u fanau ma ni faigata i lo la olaga." O la'u tatalo lea e masani ona fai. Ae e le'i umi atu ni aso, na ou mafaufau ai, ua tatau ona sui la'u tatalo. Faatatau i matagi o le olaga o le a feagai ma la'ua. Ua ou mautinoa o le a feagai la'u fanau ma ni faigata i lo la olaga. O le mea lea ua sui ai la'u tatalo i tafatafa o le la moega. Aua e faigata le olaga. O le a oo fo'i i se

aso e leai ai ni o la matua e tamomo'e iai mo se fesoasoani. O le mea lea ua sui ai la'u tatalo, ina ia maualalalo ni o la a'a, ma tau atu i le Atua Soifua o le Faavavau. Ina ia agi mai matagi ma afa, ma toto mai timuga malolosi ma lologa, ae o le a le tafefea ai i la'ua, ona ua maua'a i le Atua o le Faavavau.

---

### A Christian

A Christian is a *mind* through which Christ thinks, a *heart* through which Christ loves, a *voice* through which Christ speaks, a *hand* through which Christ helps.

---

**Manatu Autu:**  
**“AUALA FOU O LE A’OA’O ATU”**  
**(A NEW WAY OF TEACHING)**

**Tusi Faitau: Mareko 1: 21-28**

Ua masani lava tagata Iutaia i faiga a le Au Faresaio i le sapatu; e na ona o ane lava e tolaulau le tulafono, ona toe o lea. O se faiga ua faasolo ina leai se taua. O le tulaga foi lena o le olaga faa-faresaio!

A ua faate’ia tagata i le faafuase’i ona alu ane o le tagata ma faamalolo i le tagata sa ma’i. Ae sa na ona saunoa lava i le ma’i, uma ma le ma’i. O le a’oa’oga a Iesu, e o faatasi le a’oa’oga ma le faatinoga! E liutino tagata lana a’oa’oga. O le mafuaaga lea o le tau fai ofo o tagata ma fesili: *“Pe se a lenei? Se a foi lenei a’oa’oga fou?”*

E faapea foi le tala i le

mulumuluina e Iesu o vae o ona soo; i le te’i o Peteru ina ua faasolo atu Iesu ma oo atu ia te ia. Fai mai lana fesili: *“Le Alii e, e te le mulumulu ea ou vae? Fai mai le tali a Iesu: “O le mea ou te faia, e te le iloa nei, ae mulimuli ane e te iloa.”* Ona fai atu ai lea o Peteru ma lona le malamalama ia Iesu: *“E te le mulumulu lava o’u vae e oo i le faavavau.”* Ae saunoa mai Iesu: *“Afai ou te le mulumulu ia te oe, e leai sou tofi faatasi ma au.* Na faate’ia le ausoo i le a’oa’oga fou lea a Iesu. Ae na sili ona faate’ia latou mulimuli ane, ina ua uma ona ia mulumuluina o latou vae, ona

ia toe fetalai atu lea ia te i latou: *“Ua ou avatu le faaa’oa’o ia te outou, e tatau fo’i ona outou femulumulu’i o outou vae. E moni, e moni, ou te fai atu ia te outou, e le sili le auauna i lona alii; e le sili foi le ua auina, i le e ona le feau. Afai ua outou iloa ia mea, amuia outou pe a outou faia.”*

O le a’oa’oga a Iesu o loo atagia manino mai i inei - o soo se Lauga lava, ia fai lona Tino. O le faasatauroina o Iesu ma lona tautau i luga o le satauro - o le Tino lena o le Alofa o le Atua, na liutino tagata e ala ia Iesu, ina ia faaolaina ai i tatou ma le lalolagi agasala. Amene.

Saunia e Palemia Tauilili FS, Ta’ita’ifono Komiti o A’oga

(Mai le sauniga amata, Fono a le Komiti o A’oga, faia i le Maota o le Galuega - EFKS Samalaeulu, 13 Ianuari 2015)

---

## **Faiva Alofilima o le Mataupu Silisili**

*mai le itulau e12*

e tele avanoa e sa’o ai ma atoatoa ona lelei le faatinoga e pei ona moomia. O lona uiga e maua le saogalemua o le loto o le tagata ina ua iloa ma’utinoa i le mafaufau se fuafuaga, ona puipuia ai foi lea o le tagata mai i le le fiafia ina ua sasi pe faaletonu se faatinoga.

3. E Ma’ale’ale Faatinoga (Risk of Acting)

Fai mai le manatu o Soren Kierkegaard, “ o le taimi e fai ai se faaiuga o se taimi faigata lea ma le le ma’utonu”. (the instant of decision is a madness).

O le faiga masani, a o le’i faia se faaiuga i se mataupu, e tatau lava ona liuliu le tofa ma le moe ina ia silafia ni lelei ma ni faaletonu e

ono fanau mai i se faaiuga o le a faia. Peiseai e fua a tatou faatinoga i le faasoa mai o le iloa-i-le-mafaufau o se mea e tatau ona silafia muamua a o le’i faatinoina. O lona uiga ia mafaufau toto’a muamua ona faato’a fai ai lea.

Peitai e le tatau lava ona saga tamau ai i lena foi faiga o le iloa muamua i le mafaufau o se mea ona faato’a faatino ai lea. Aua a faapena i taimi uma, ailoga la i se a o le a vave ona faatino se fuafuaga pe afai e alu le taimi o tau saili ni mafaufauga lelei i se mataupu. E peiseai e faapena se faitioga masani o iai nei e faasaga i faiga filifiliga a Samoa i lana soalaupule faatamalii. A faigata ona maua se tasi o finagalo ona moe lea o le toa e sau pea se taeao

fou e toe lauliliu ai le tofa ma le faautautaga sa’ili. Afai la e alu le tausaga atoa o moe pea le toa, o afea la e faatino ai se faamoemoe? O lona uiga e tatau lava ona iai se isi faiga tatou te ‘alo ese mai ai i le faaosoosoga lea o le fesiligia o le faasoa o le iloa-i-le-mafaufau lelei, ae tula’i loa e faatino i se mafai e gata ai. O le tulaga ma’ale’ale ma le mata’utia lena e oo iai le soifua ‘faatino’ o le tagata. Aua e fa’i o le naunau e faatino se galuega, ae le ‘asa lava ma se maumau pe a le faato’ato’a lelei ona fai. O le ala lea ou te manatu ai a’u, e iai pea foi le mata’utia ma le ma’ale’ale ia tatou faatinoga pe afai e laaloga le silasila i le tuualalo mai o le iloa ma’utinoa i le mafaufau ia tatou faiga faaiuga.

A manatu ia Aperamo lea e ta’ua e le aposetolo o Paulo ‘o le tama o e faatuatua’ - (Roma 4:11),  
*faaauau itulau e 14*

---

# Faiva Alofilima o le Mataupu Silisili

*mai le itulau e 13*

o ia lava o le faata'ita'iga sili o le faia o le finagalo o le Atua a o le'i iloa ma malamalama lelei i lena faatonuga. A o le'i ta'ua foi e le tusi o Kenese le faatuatua lena o Aperaaamo i le Kenese 15:6, na mua'i faailoa mai lava ia i tatou i le Kenese 12:4: 'Ona alu ai lea o Aperaaamo e pei ona fetalai mai o le Alii ia te ia.' Fai mai le Tusi Paia: "Ua fetalai mai le Alii ia Aperaaamo, ia tuua e oe lou nuu, ma tagata o lou nuu, ma le aiga o lou tama, ae alu atu i se nuu, ou te faasino atu ai ia te oe. (Kenese 12:1). Ona alu ai lea o Aperaaamo ma le ".....le'i iloa poo fea a alu iai." (Eperu 11:8). E leai ma se faaaliga manino mo Aperaaamo poo fea tonu e alu iai lana malaga. O lona uiga sa leai se mautinoa, leai foi se iloa i le mafaufau. Pau lava o lea, o le "Alu, alu loa, ma faia loa..."

Atonu o se faailoilo taua lava mo i tatou ua maua mai i lena fuaiupu o le Tusi Paia, "matou te faia lava ma faalogo iai." E le o taimi uma foi tatou te faatinoina ai se manatu poo se faamoemoe e faalagolago muamua ai i lo tatou iloa i le mafaufau (poto/atamai) e faatonu mai. Tele taimi o lo tatou ola, tatou te faia ai ni faatinoga lelei a o tatou te le'i iloa ma malamalama muamua i se mea, pe tatou te le'i mautinoa foi se taunuuga o faatali mai.

A o faasoosoina pea i tatou i le tele o taimi i le taua o le mua'i iloa-i-le-mafaufau e saogalemu ai faatinoga uma, e faapena foi ona faatonu mai lo tatou faatuatua e faia loa se galuega e aunoa ma le iloa malamalama o lona uiga loloto. Fai mai le tuualalo a le fatuatua ia i tatou i le tele o taimi - .....talitonu loa...talitonu loa....ma le loto atoa - alu, alu loa, ia faia

loa.....e pei ona faia e Aperaaamo.

O le fuaitau, "*matou te faia lava, ma faalogo iai,*" e peiseai ua fautua mai e tataua lava ona faia i le faatuatua soo se faamoemoe ona mulia'i lea saili poo a ni mafuaaga e tataua ai ona faia. E faapena foi se manatu o St. Anselm, '*o le mataupu silisili o le faatuatua o loo saili ina ia malamalama*' (theology is faith seeking understanding). Fai mai foi a ia, "*Ou te le saili ina ia ou malamalama e mafai ai ona ou talitonu, ae ia ou talitonu ina mafai ona ou malamalama.*" (I do not seek to understand so that I may believe, but I believe so that I may understand). E 'auga e tasi foi lena manatu ma le finagalo o se tasi o uluai tama o le Ekalesia o St. Augustine lea e fai mai a ia, "*Seiloga e te talitonu ona e malamalama lea i se mea.*" (Unless you believe, you will not understand). O lona uiga o le faatuatua o le tagata e faama'ite ma na tuleia le faatinoga o mea, a o le'i iloa manino i le mafaufau.

#### 4. O le Molimau a le Faatuatua (Test of Faith)\

E mafai foi ona faamatalaina lena lava fuaiupu o le Tusi Paia mai se isi vaaiga faale-mafaufau e fesoota'i ai ma 'ita ma lota olaga. E pei la o lena, "*Ou te faia lava, ma faalogo iai.*" O le faasaga mai o le faitauga ia ta 'ita ma lota olaga, e peiseai ua lautele ma loloto ai lata vaai i le uiga ma le faamatalaina o le tali atu a le tagata i le Atua. Afai e faapena se faitauga, ona faapea lea o ni mafaufauga e tutupu a'e:

***Taga'i i lou olaga ona e iloa lea o le mea o loo o'u faaloga ma malamalama iai.***

***Taga'i i mea o o'u faia, ona e iloa lea o le mea moni o loo o'u***

*iloa ma talitonu iai, e te iloa manino ai lava lo'u faatuatua.*

I lea lava faitauga fou, o le mea moni ua tau lagona lota li'a. Aua ua pei o so ta faamasinoga ua faafuase'i ona fuatia ai lota olaga. Aua o le tele o taimi ta te matau ma faavasega fua le soifua faatino o isi tagata mo le Atua. I se isi faaupuga, o lea ua matua faalava lelei le utupoto i lo'u mata e pei o o le fetalai a Iesu i lana a'oa'oga i luga o le mauga (Mataio 7:1-5). O lona uiga, e peiseai o le mea moni (truth) e le na ona faamalamalamaina o lota pogisa, ae na te tu'ua'ia ma faitioina foi ita i mea ta te vaivai ai. E masani lava ona oo mai lena mea moni i se tulaga e na te faatiga mai ai i lota loto, ae le na ona faamalamalama o lota olaga pogisa.

Fai mai Iesu, "O lea foi tou te iloa ai i latou i o latou fua." (Mataio 7:20. O le fesili: Pe le o le mea moni ea lea o le molimau a le faatuatua: O lo tatou ola atoa e ao ona avea ma fua lelei ma molimau mo Keriso.

O taimi uma o lo tatou ola ma mea uma tatou te faia, e ao lava ona soifua le tagata ma le mautinoa, tatou te tali atu i lo tatou faamasinoga. I se isi faaupuga faigofie, o lo tatou ola faatino (action), o se aiaiga ogaoga lea mo le tali atu i le fetalai mai o le Atua ia i tatou. Aua foi e vaivai pea le tagata, ma le mafai ona ola i se olaga magafagafa lelei, ona le atoa ai lea o lona ola faatino e pei ona moomia e le Atua.

E tele a'oa'oga faa-Rapi ma faata'oto a le Alii ua tatou iloa ai, o le Tulafono (Torah) ma le Upu a le Atua e atugalua lava ia tatou galuega faatino ma le olaina o o tatou olaga, nai lo lo tatou iloa. Ua iloa lea mau i faata'oto e lua e pei ona tusia i lalo: (faataoto muamua e mai tusitusiga faa-Rapi; a o lona lua mai le Evagelia a Mataio).

---

# Faiva Alofilima o le Mataupu Silisili

*O le tagata e atamai ma tele lona silafia ae e tau le galue - e faatusa o ia i se a? E faatusa i se laau e ola mafala ma tele ona lala ae tau leai ni ona a'a. E agi mai matagi ma lafoina i lalo.*

*A o le tagata e tele ana galuega lelei e fai ae vaivai lona silafia i le mafaufau - e faatusa o ia i se a? Ua pei o se laau e tau leai ni ona lala ae tele ona a'a; e agi mai matagi uma o le lalolagi ae le mafai ona lafoina o ia i lalo.*

*O lenei, ai se faalogo i a'u upu nei, ma faia, ou te faatusaina o ia i le tagata poto, ua na faia lona fale i luga o le papa; ona to mai lea o uaga, ua oo mai foi tafega, ua agi mai foi o matagi, ua pesi mai i lea fale, ae le'i pa'u lava ia, aua ua faavaeina i luga o le papa. Ai se faalogo foi i a'u upu nei, ae le faia, e faatusaina o ia i le tagata valea, na na faia lona fale i luga o le oneone, ona to mai lea o uaga ua oo mai fo'i tafega, ua agi mai foi o matagi, ua pesi mai i lea fale, ona pa'u ai lea, ua nutipalaina lava. (Mat. 7:24-27).*

Ua faamanatu mai e nei faata'oto uma, ua le gafataulimaina e la tatou faalogo poo lo tatou iloa, ile-maufaufau ona avea ma taula o o tatou olaga. Aua e faigofie lava ona tafiese ma faaleagaina, pe a le faavaeina i luga o galuega lelei. O a tatou foi faatinoga ma galuega, o a'a aupito loloto ma malolosi na e fai ma faavae mautu - ae le na o le iloa i le mafaufau (knowing) e pei ona finauina e nisi. E taua ai se tasi o manatu faa-mataupu silisili, 'O le faatuatua na te tuleia i tatou e fai le galuega faatino e tataua ona fai, ae le na o le galuega mafaufau. O le lu'i mo le tagata faatuatua, 'Ia e faatino e sili atu nai lo le mea o loo e iloa, ina ia e

*malamalama e sili atu nai lo le mea o loo e iloa'ina'.*

I le fuaiupu lava la ua avea ma manulauti o lenei tusiga, ("matou te faia lava ma faalogo iai") ua manino ai le finau mai o faatinoga ma galuega e tulaga muamua i latou i le faasologa, aua o a tatou faatinoga e afua ai lo tatou iloa malamalama o se mea. Fai mai Abraham Heschel: "Tatou te le maua le faatuatua ona o galuega; peitai e mafai ona maua le faatuatua e ala i galuega paia ua faia. I le talitonuga faa-Kerisiano, o loo mafai ona molimau mai le tusi a Iakopo i le taua o le faatuatua lena e iloa i galuega.

*O'u uso e, se a le aoga pe a fai mai se tasi ua ia te ia le faatuatua, ae le ia te ia galuega? E mafai ea e le faatuatua ona faaola ia te ia? Afai ua le ofu se uso poo se tuafafine, ua leai foi sa na mea e 'ai i lea aso ma lea aso, a fai atu so outou ia te i latou - "Ina o ia outou ma le manuia, ia mafanafana ma ia ma'o'ona," a ua le foa'i atu ia te i latou ni mea e tataua i le tino, se a lona aoga? E faapea foi le faatuatua, pe afai e le iai galuega, e mate lava ia ina ua na o ia. Ae fai mai se tasi, "o ia te oe le faatuatua, o ia te au foi galuega", ou te faali foi ia te oe lo'u faatuatua i a'u galuega. (Iakopo 2: 14-18).*

## 5. O Nai Mafaufauga Faa-mataupu Silisili (Theological reflections)

E sala ina fememea'i le mafaufau o le tagata pe a oo ina oia gasologa masani o mea o le olaga. Na ou ta'ua i le amataga le tulaga ese o le fuaiupu lenei mai le tusi o Esoto i lona faata'otoga. Fai mai le fuaitau: "O mea atoa uma ua fetalai mai ai le Alii, matou te

**faia lava, ma faalogo iai."** O le talitonuga faa-Rapi lava latou, o loo sagatonu mea uma, e leai se mea o faaletonu. O le ala foi lea ua avea ai ma fuaiupu e faamanatu pea e tagata Iutaia ona o lona taua. E peiseai e le sagatonu i le faitau ma le mafaufau, ae o loo ta'oto i se fe'au taua o le faiva alofilima o le mataupu silisili (*practical theology*) i le va nonofo o le Atua ma lona nuu o Isaraelu, e afua i la latou feagaiga na osi. O lona uiga, e matua taua le faamuamua o le ola faatino o le tagata i lana tali atu i le Atua. O le finagalo lava latou o le Atua mo ona tagata ia tausii lana tulafono ma ola i upu uma e fetalai mai ai o IA. O le faatinoga a le tagata e le faamoemoe tele i sona iloa-ile-maufaufau poo sona atamai, a o le usita'i ma faia loa le mea ua finagalo iai le Atua.

E ui lava ina saogalemu le iloa-ile-maufaufau e le tagata o le feau a le Atua, a o le saogalemu e faalagolago i le faatinoga o mana'omia e le Atua. A oo ina fesaga'i le Atua ma Isaraelu i lalo o aiaiga o le feagaiga, e le tau sailia se silafia ma se malamalama o Isaraelu i le finagalo o le Atua. Tau lava o le faatino ma usitai loa i le Upu a le Atua. E moni e taua ma saogalemu le faamoemoe o le iloa-ile-maufaufau o le finagalo o le Atua, peitai e le o le faamuamua lena i le talitonuga o le Isaraelu e tali atu i lona Atua.

I le finauga masani i le va o mafaufau loloto (theory) ma faatinoga (practice), e talitonu lava nisi i le taua o le iloa ma malamalama muamua ona faigofie lea ona galuea'iina ma faatino se fuafuaga o mana'omia. Peitai o loo iai pea foi le taofiga a nisi i le faiva alofilima o le mataupu silisili (practical theology), e fanau mai 'mafauauga loloto' e uiga i se mataupu ina ua matua suesueina lelei ni 'faatinoga'. O le ala lena e taua ai le liuliu pea o le tofa mai lea taimi i lea taimi, ina ia tala

---

# Fonotaga Lona 27 a 'Au Taumafai Kerisiano a le Lalolagi na Usuia i Korea i Saute - 20-27 Iulai 2014

A o le'i tu'uina atu se tala o le Fonotaga a Au-Taumafai Kerisiano o le lalolagi sa usuia i Korea i Saute; e muamua lava ona momoli atu le faamalo ma le faafetai a le Peresitene ma le usugafono a le Komiti Au Taumafai i le paia sau'o o le Ekalesia Aoao i la outou tatalo ma tapuaiga ua fo'i manuia mai ai le fonotaga. E fa'afo'i ai le viiga i le Atua, ona o lona agalelei tausi ma lona alofa taumulimuli i mea e potopoto ai se toalua po'o le sili atu fo'i ona o lona suafa.

Faafetai, faafetai tele lava.

O le aofa'i o Au-Taumafai Kerisiano na auai i le fonotaga talu ai nei e tolu sefulu lua, ae tolu sefulu atunu'u o le lalolagi na auai. O le malo o Initia e lua a latou Au Taumafai.

O le manatu Aoao o le Fonotaga. "FAFAGU LE LALOLAGI, E TULAI MA GALUE." "WAKE THE WORLD, RISE UP AND DO IT."

O le uiga o le manatu aoao; "Ua mana'omia le au-Kerisiano e fai le galuega a le Alii

a'o loo ala ma malosi. E iloa se galuega e fai, ina ua pupula mata, ma ua maua le malosi fou mai se malologa sa fai. O se valaau mo tagata uma o Keriso, ia galulue ma le mata'alia, galue ma le fiafia, ia galue ma le mautinoa e manuia auā o loo fa'atasi mai le Alii ma lona Agaga Paia.

E fa vaega tetele e ao ina taulai iai le vaai a le tagata o Keriso.

(a) "Auauna i le Atua, ma loto ua maopopo ma tu'u-fa'atasi."

**Serve God through fellowship.**

(e) "Auauna le Atua, i lau Talaiga."

**Serve God, through Mission.**

(i) "Auauna le Atua i le Faamaoni."

**Serve God through Loyalty.**

(o) "Auauna le Atua i lau Tapuaiga."

**Serve God through worship.**

Sa iai pepa o le suesuega o le Tusi Paia, sa faapupula atili ai le uiga o le manatu Aoao. Na taua i nisi o pepa, le Aposetolo o Paulo, ma fa'atusa lona olaga fa'asauā i le au Kerisiano, o foliga o se tasi o lo'o moe i le pogisa.

Ae na fafagu o ia e le Alii, ma pupula ai ona mata, ua tulai ma ua maua lona malosi, ma ua naunau ai o ia e fia galue, ma fa'atuputele ai lona fia galue pea.

Sa avea foi le foafoaina e le Atua o mea i le Amataga, e saga fa'amatalaina ai le manatu Aoao. Na foafoa e le Atua mea uma, a o loo pupula ona fofoga, o loo ala ma malamalama i ana galuega o loo fai. Na matagofie ma lelei mea na faia e le Atua, ona sa fua i le silasila a le tagata o loo faia a o ala.

Sa fa'amanino foi e nisi pepa o le fono, Iesu ma le faatinoga o ana galuega. Poo le a le tumutumu o le motu o tagata, ae na silafia lava e Iesu tagata o loo fia maua se mapusaga. O le tagata o loo galue ma ona fofoga o loo ala. Na silafia uma e Iesu tagata mafatia ma puapuagatia ma pa'i atu iai ona aao. Sa matala lelei le faalogo a Iesu, sa ia lagona mamao atu ai i'uleo o tagata o loo valaau mai ia te ia e avatu le ola.

O le lu'i lina na ta'ape ma usugafono o le Fonotaga, e le faia moe le galuega, e le mafaia foi ona fai se galuega ae o loo ta'agulu ma moe gase.

O nisi itu taua o lena fonotaga, o le fa'amausali atili lea o le taua o le ola tatalo. O polokalame o aso ta'itasi, e amata lava i le mafutaga tatalo i le itula e ono i le taeao. O le manaia o ia mafutaga tatalo e faigofie ai ona iloa mafatiaga eseese o loo feagai ai le lalolagi ma ona tagata. E uma ane le vaiaso, ua pei se aiga e tasi tagata o le fonotaga, e ui ina le malamalama i gagana.

Sa iai le aso o le fonotaga, sa fa'aaoga ai le 'afa o le aso, e alu ai le matamataga i nisi o nofoaga taua o lena vaega o Korea  
*faaauau itulau e sosoo ai*

---

## Faiva Alofilima o le Mataupu Silisili

feauga lelei faatinoga ma manaoga o le fanau a le Atua. Ui i lea, e le mafai foi ona teena le mana'o masani i le ma'ale'ale o faatinoga a le tagata i lana tali atu i le Atua. Ou te talitonu o le tulaga ma'ale'ale lina o faatinoga e tatau lava foi ona mata'itu pea i le gasologa o la tatou galuega faa-faifeau.

O le faatuatua o le tagata i le Atua e faigofie ai ona faatino muamua ae mulia'i ona iloa-ile-mafaufau le finagalo o le Atua mo ia. E moni

ai se tasi o fuaitau e pei ona ou ta'ua muamua, 'o le faatuatua na te tuleia i tatou e faia le galuega faatino e tatau ona fai ae le o le galuega mafaufau'. Ai lava o le uiga lea o le olaga o Aperamo le le 'tama o e faatuatua i le Atua.' E le fesili pe sailiili ia iloa le uiga o le fetalai mai o le Atua, ae na alu lava ma le talitonu i le faatasi mai o le Atua mo ia ma lona aiga.



---

# Fonotaga Lona 27 a 'Au Taumafai Kerisiano a le Lalolagi na Usuia i Korea i Saute - 20-27 Iulai 2014

i Saute, auā e le mafai ona so'o le atunu'u i se aso e tasi.

O le a fa'amatala atu pea mea sa ofo ai la'u vaai i le matou malaga matamata. O le mea muamua sa ou maitauina, o le fa'aogaina o le eleele po'o fanua. Se e leai se fasi fanua e ta'atia fua e le o ola ai se laau 'aina poo se laau toto. Na aumai se faamatalaga, o laufanua o Korea i saute o le 80% o le laufanua, o mauga, e itiiti lava nai eleele laugatasi. E fa'aaoga uma fasi eleele i luga o auala tele, i autafa o le auala, e laina ai tamato, poo ni saga, i autafa atu o le auala o loo iai ni toga kapisu, toga araisa. E iai nai nofoaga e iai faleoloa (small shopping centres), e laitiiti nai mea e paka ai taavale, a o va o faleoloa, e ola ai kapisu, toga araisa, tamato.

O lalo o mauga ma agai atu i luga o mauga, e opo atoa e fualaaui 'aina, ae o nei faatoaga uma, e ese le ola. O nisi fa'atoaga o fualaauiaina i se fanua laugatasi, e matauina pe to'atasi lava se lo'omatua o lo'o fa'atu mai ai i le totonu o se togalaau, ia poo le sasalaina foi o ni laau. O ni tagata e ese ma le galulue.

Ou te lei vaai lava i se lafu povi, po'o ni pa mamoe. Fai mai le tala, e fai lafu manu, ae fai i totonu o fale, o ni fale e matua tetele lava, e la'u iai vao ma tasi ai i totonu o nei fale, ona o le utiuti lava o le eleele, auā a fai se lafu manu o le a tele se laufanua e alu ai.

A o alu la matou malaga, sa maitauina ai eleele laugatasi, pe 5 eka le tetele, poo ni fanua foi ua tanu. O nei fanua e fausia ai fale e fogafale sefulu pe sili atu foi. E putuputu ai lava i sea nofoaga. Ia o le nuu lena o na tagata; auā e mau totogi tagata i fale mauaululuga nei, o o latou aiga lava

na e nonofo ai; auā foi e leai ni eleele e fau ai ni o latou lava fale. E nonofo tagata Korea i fale mauotogi nei i o latou olaga, atoa vagana foi ua to'atele se aiga, ona su'e foi lea o nisi fale. O le taulaga lava o Seoul, e pei lona tele o le 'afa o Upolu, ae o le faitau aofai o tagata e nonofo ai e sili atu ma le 15 miliona. O nei tagata e nonofo i fale talimalo, e fogafale sefulu pe sili atu foi.

O le tala fiafia a tagata, o Korea i Saute e leai ni mafuie malolosi e ono luluina ai ma fa'aleagaina ai nei fale mauaululuga.

Sa oo la matou matamataga i le tuaoi o Korea i Saute ma Korea i Matu. Manatu e eseese faiga malo a Saute, ese

foi matu. O matu e pulea faa-kominisi, a o saute e faa-temokarasi. E le saoloto le femalaga'i o tagata. Afai e fia malaga se matu i saute, e matua fai lava pepa malaga. O le mea malie o loo tupu, e leai ni tagata Korea i saute e fia o i matu; ae o le anoanoai o tagata matu e fia o i saute. O le mea foi lena e leoleo lelei ai e saute o latou tuaoi – ia aua nei faigofie ona sao mai ni tagata mai matu. E laina ai leoleo o saute i auala a o le tuaoi, ma fale o fitafita e tiute faasoloatoa ma a latou fana ma au'upega.

Saunia e

Rev. Elder Siolo Tauati

---

## Lo'u Afafine e, o Lou Faatuatua ua e Malolo ai

**(Mareko 5:34: A ua fetalai atu ia ia te ia, "Lo'u afafine e, o lou faatuatua ua e malolo ai; ina alu ia oe ma le manuia, ma ia e malolo i lou ma'i tiga.")**

O se uati tatagi e le o se meaalofoa lea e matua fiafia iai se tamaitiiti i le Kerisimasi. Ae na fai la'u faafetai ina ua ou maua, ma ou tago iai ma ave i le faatu i luga o la'u laulau i totonu o lo'u potu moe.

I nei aso, ua matua tele lava le mau ituaiga uati ua maua i faleoloa. O uati e tatagi pei se timu pe a oo i le taimi ua tataua ona e moe ai. O uati e pa'o e pei o le 'ote a lou tina pe a oo i le taimi ua tataua ona e ala ai. O le uati foi e tatagi leo tele ma oo ina feou uma ai maile a aiga tou te tuaoi.

A o le uati na ou maua, ai lava o le uati aupito faama'ima'ia lea o iai i le maketi. E le sa'o ona taimi; e tau le lagona lana tatagi; ma e

taumate e na o se 50 sene lona tau.

Ae tasi le mea na sili ai ona ou mana'o iai, ona a pogisa, ona pupula malamalama ai lea o le uati. A ao, ona inuina lea e la'u uati le malamalama o le la ma teu i ona totoga; a po, ona susulu ai lea e pei o se moli. A ou tago atu e tape lo'u moli eletise o le a ou moe, a o le taimi lea e puna mai ai le malamalama susulu o la'u uati.

E pei o le malamalama na maua e le fafine ina ua feiloa'i atu ia Iesu. Tatou te le iloa lona igoa; ae tatou te iloa le ituaiga olaga o iai. O lona lalolagi e pogisa e pei o le aupouli.

Faitau foi: (Mareko 5: 24-26):  
*faaauau itulau e 18*

---

# “Lo’u Afafine e, o Lou Faatuatua ua e Malolo ai”

(Mareko 5:34: A ua fetalai atu ia ia te ia, “Lo’u afafine e, o lou faatuatua ua e malolo ai; ina alu ia oe ma le manuia, ma ia e malolo i lou ma’i tiga.)

“Ona la maliu atu lea ma ia; ua mulimuli atu foi ia te ia le motu o tagata e toatele, ma latou fetaomi lava ia te ia. O le tasi fafine fo’i, ua ia te ia le puna toto i tausaga e sefulu ma le lua, e tele foi mea na ia tiga ai i foma’i e toatele, ua uma atu ai foi ana oloa, ae le’i aoga lava ia te ia, ae peitai ua atili ai lona ma’i.”

Sefulu ma le lua tausaga o ma’i puna toto!.....Ua uma atu ai ana

oloa!.....ae le’i aoga lava ia te ia, a ua atili ai lona ma’i.

O se puna toto faapea o se mea e faapologaina ai soo se fafine i soo se atunuu. Ae mo se fafine Iutaia, o se mafatiaga mamafatu!

*I lo la va ma lana tane*, e sa ona papa’i atu iai, pe afai o nonofo pea ma lana tane!

*Mo sana fanau*, na te le maua ni tamaiti!

*I le tausiga o le ‘aiga*, soo se mea

e papa’i iai ua le mama lea.

*I le itu faaleagaga*, e sa ona ulufale atu i le malumalu.

Ua matua mafatia lava le fafine, ma ua faatagataeseina i lona siosiomaga.

I le tusi o le Talamuta (Talmud) a tagata Iutaia, o loo ta’ua ai ni togafiti se sefulu ma le tasi mo lea ma’i o maua ai le fafine. E le taumate ua uma ona faia e ia.

*faaauau itulau e sosoo ai*

---

## Tapua’i Faalilolilo ia Keriso

E tele lava tala i lotu e fai faalilolilo e le ‘Au Kerisiano i aso o pulega faa-komunisi a Rusia. Sa faasa ona fai o ni tapua’iga a tagata Kerisiano, o le mea lea sa faalilolilo ai ona fai a latou lotu.

Na ou oo iai ma ou auai i se tasi o ia sauniga fai faanana. Sa fai i le fale o se aiga. Na maua se kopi o le Evagelia a Luka e tagata o le aulotu, ona latou tufatufaina lea itulau o le Evagelia i tagata o le aulotu, latou te o ma latou i o latou fale, ma latou taulotoina. A foi mai i le Aso Sa e toe potopoto ai, ona fesuia’i lea o itulau ma isi, ma o ua toe tauloto foi itulau fou ia. O se faailoga lava lea o le fiafia o tagata e faitau i le Tusi Paia, lea e faasa foi e le malo ona faasalalauina.

I Aso Sa ta’itasi, e taunuu faalilolilo Kerisiano i le fale, e taunuu ta’i tasitasi atu iai, nei iloa mai lo latou potopoto e leoleo nana poo sipai a le malo o Rusia lea e

ta’u o le KGB. A potopoto uma loa i totonu, ona tapunipuni lea o faitoto’a ma faamalama, ina ia ‘aua nei iloa ma lagona mai le latou sauniga o fai i totonu. E masani lava ona amata a latou sauniga i pesepesega o viiga i le Atua.

A o le isi Aso Sa, na te’i lava ua tatala faamalosi mai le faitotoa e fitafita e to’alua, o ‘u’u faaagaga a la fana otometi, ma valaau leotele mai, “Laina uma i le puipui o le fale! Afai e te fia tetee i ou talitonuga ia Iesu Keriso, alu loa i fafo.”

Na liliu le to’alua pe to’atolu ma savavali i fafo. E le’i umi, ae mulimuli atu ai ma le isi to’alua.

Toe valaau mai le fitafita, “O le tou toe avanoa leni. Filifili pe tou te fulitua i lou tou faatuatua ia Keriso, ma outou o ese nei, pe tou te nonofo mai pea, ma faataunuu ai ia outou faasalaga e fitafita.”

Na savavali lemu ese atu se isi to’atolu, ua ufiufi o latou mata i o

latou ofu. A o le toatele o le aulotu faalilolilo, ua na o le tutu nei ma le gatete. Ua fetagofi ifo foi nisi o matua, ua fusi atu nai a latou fanau, ma fetagisi, ona o lo latou manatu, o le a taolo nei fana otometi a fitafita ma fasioti ai latou.

Ua te’a ni nai minute e leai se pisa. Ona tapuni ai lea e le fitafita le faitoto’a. Na vaavaai atu o ia i tagata o le aulotu lea e laina mai i le puipui o le fale, ma fai atu, “Uso ma tuafafine, sisii pea i luga o outou lima, ae aua tou te fefefe, ae vivii ma tapua’i i le Alii o Iesu Keriso. O matou foi o Kerisiano. Ni nai vaiaso ua mavae, na auina ai foi matou i se isi fale o fai faalilolilo ai se sauniga lotu, e tapu’e mai Kerisiano o potopoto ai. Peitai, na faaolaina ai matou i le sauniga sa fai ai. Na matou mautinoa ai, e te le talitonuina se tagata, pe a le tutumau lona faatuatua se’ia oo i le oti.

tusia e Charles Swindoll

---

# “Lo’u Afafine e, o Lou Faatuatua ua e Malolo ai”

Fai mai “ua uma atu ai fo’i ana oloa.” I aso uma, e ala mai ai i se tino e le mana’omia e se tagata. E ‘alofia e tagata! O se mea leaga i tagata! Ua ui ese tagata pe a vaai mai iai o alu atu. Ua oo nei ina ua na o le tasi lava le tatalo o totoe ia te ia. Ma o le aso lea na tatou vaavaai ai ia te ia o feiloa’i atu ia Iesu, na fai ai lana tatalo o totoe.

A o le taimi na oo atu ai ma latalata ia Iesu, a ua fetaomi atu tagata i le Alii. O loo aga’i atu le Alii e fesoasoani i le afafine o Iairo, o le tagata aupito taua lea i le nuu. Mata e amana’ia e Iesu le fafine a o aga atu o ia i le tagata taua o le nuu? Ae mata e iai se isi avanoa pe a misi lenei?

A o le taimi lava na fetoto’i ai faafesili i le mafaufau o le fafine, na lototele ai ma faapea ane: “Afai ou te pa’i atu tau lava o ona ofu, ona ou malolo ai lea.” (Mareko 5:28).

Ae o le ala i le pa’i atu ia Iesu e ui atu lea i le motu o tagata e to’atele o loo fetaomi atu ia Iesu, ma papa’i atu ai i tagata, o se mea e sa ona e le mama o ia, o loo maua i le ma’i leaga o le puna toto.

Ua leai ni ana tupe; ua leai ni ana uo; ua leai nisi e fesoasoani ia te ia; toe tasi lava le mea o totoe nei, o lona talitonuga e mafai ona fesoasoani Iesu ia te ia. FAITH! O le FAATUATUA! O lona faatuatua e mafai ona fesoasoani Iesu ia te ia.

Ua vaavaai atu i le anoano o tagata o fetaomi atu ia Iesu, o tagata mama; e le mama’i; e le mama’i i ni ma’i leaga e pei o lea e maua ai ia - o le puna toto ua 12 tausaga. A faapefea lava ona manatu mai Iesu ia te ia o le tagata e le mama, e ma’i, e ma’i leaga, e

sa ona papa’i i se tagata, e sa ona papa’i ni tagata ia te ia aua e avea ai foi i latou ma tagata e le mama?

Ae tasi lava le mea o loo i le fafine lenei e le o maua e le toatele o i latou o fetaomi atu - FAITH! O LE FAATUATUA. Talitonu! Faatuatua e mafai e Iesu ona faamaloloina o ia.

Fai mai le Tusi Paia: “A leai foi se faatuatua e le mafai ona fiefia mai o ia, aua e tatau i le alu atu i le Atua, ona talitonu o loo soifua o ia, o ia foi na te tauia mai o e matua saili ia te ia.” - Eperu 11:6. O le faatuatua o le talitonu lea e iai le Atua, ma o le Atua e faamaoni. O le faatuatua e le o lou talitonu lea e faia e le Atua le mea e te mana’o iai. Leai! O le faatuatua o lou talitonu lea e faia e le Atua le mea e sa’o ma tatau.

O le vaega a le fafine i lona faamalologa, e laitiiti lava - o le ‘a’apa atu lea o lona lima ma pa’i atu ia Iesu. “Afai ou te pa’i atu tau lava o ona ‘ofu, ona ou malolo ai lea.” O le la e vevesi Iesu i le fetaomi atu o le motu o tagata, ae o lenei e tau faavava atu lava le fafine. “Afai ou te pa’i atu tau lava o ona ‘ofu....!”

E le’i liliu ane Iesu ma fai se vai mo le ma’i, a ua fai lava e le fafine ia, ua amata e ia lava le fofo - i lona faatuatua. FAITH!

Le ‘au faitau, o Iesu o le vai o ma’i. O Iesu o le vai e malolosi ai ma’i. Papa’i iai! ‘A’apa atu lou lima i le tagata mamana! Na fai e le fafine ma’i, ma o le taimi lava na papa’i ai ia Iesu, na utu ai le puna toto, ua malolo! Ua mapu! Ua sa’oloto! Ua ea lona pologa!

Tiga ona tumutumu o tagata ma militino ma Iesu, ae na silafia lelei e Iesu e iai le tagata e ese lana

papa’i atu ia te ia. Faalogo: “Poo ai ea na pa’i mai i o’u ofu?” O le a lenei ituaiga fesili o loo tautulei le motu o tagata i le fia oo ia Iesu?

A o le taimi lea na faaofiofi atu ai le fafine ma’i, ma faapa’u i ona luma, ae fetalai le Alii: “Lo’u afafine e, o lou faatuatua ua e malolo ai; ina alu ia oe ma le manuia, ma ia e malolo i lou ma’i tiga.”

*O le fofo o le ma’i, na amata e le ma’i, na amata i le pa’i atu o le ma’i i le tino mamana ma le pa’ia!*

O le fesoasoani a le Atua e latalata mai lava, ae faato’a e maua pe a e sa’ili iai. E le teena e le Atua le faatuatua moni o le tagata ia te ia. Ae tatau ona e faatuatua ma faatino. E le tatau ona na ona e tatalo i lou fia malolo, ae tatalo ma su’e le fofo. Ma ia e manatua e mamana le Alii.

Faamatala e Mareko, ina ua pa’i atu le fafine lenei ia Iesu, e lua mea na tutupu e le’i tupu lava i se isi vaega o le Tusi Paia.

**Muamua**, ua malolo le ma’i ae le’i silafia e Iesu le ma’i ma ni ona auga ma ni mea e tiga pe leaga o lona tino. Ua alu atu le mana nai ia te ia.

**Lua**, ua ia ta’ua o ia o le afafine. “Lo’u afafine e, o lou faatuatua ua e malolo ai.” Ona pau lea o se taimi ua ta’u ai e Iesu se teine, se fafine poo se tama’ita’i, o le afafine. Ona pau lea! Ona pau a lea o le taimi ua gagana ai Iesu faapea!


O le fafine ua le mana’o iai se isi; ua faatagataeseina; ua ‘alo ai tagata ma ua le fia papa’i iai, a o lea ua fetalai Iesu, “lo’u afafine e!”

Maufaufau ane poo a lagona o le  
*faaauau itulau e 20*

# O E UA MALILIU

## Fusita Tusigaigoa Falefata'alii

25 Setema 1956-31 Oketopa 2014



O le alii tiakono o le Ekalesia i Falefa. Na soifua mai i le aso 25 Setema 1956 ae maliu ia Oketopa 31, 2014. Na faaipoipo ia Tufa Lealasa aso 4 Iulai 1992. Na faa-Ekalesiaina i laua ia Setema 1992, ae faaee iai le tofi tiakono ia Ianuari 11, 1995. E 19 tausaga o

galulue i le tofi tiakono.

O se tama to'aga i sauniga lotu i Aso Sa uma vagana tausaga mulimuli o lona soifua ina ua gasegase. Ou te oo mai i Falefa nei i le 1977, o avea ia o se sui o le aufaipese faapea le autalavou se'ia oo ina ua maliu.

Sa avea ma faamasino (ta'ita'ipese), avea foi ma sui faamasino i tausaga e tele. O lona matakale ole tasi o matakale lelei ma le taumafai malosi e le pa'u i se mea e fai.

E lelei le faasinoga o lana fanau, e faasino i le lotu ma faasino e auai i faalapotopotoga uma o le Ekalesia, pei o le Autalavou Matutua, Autalavou Laiti ma le Aufaipese.

O le tama ia Fusita na ofo na te tatalaina ma toe tapuni lo matou falesa i Aso Sa uma, o ia foi e taina le logo o tapuaiga i Aso Sa uma. O le galuega foi lea na fai e lona tama (Falefata'alii) a o soifua. Ina

ua maliu lona tua'a ona ofo lea o Fusita na te faaauauina lea galuega.

O se tama filemu. E le lagona lona leo i ni fonotaga na o le ata lava ma faamalo. E tausi faifeau ma faamaoni i ona tiute faale-Ekalesia.

Auauna lelei e ma le faamaoni, ulufale maia i le fiafia o lou Alii. Amu'ia lea auaua e maua mai e lona Matai o loo faapea ona fai.

O lona toe sauniga na faia i le aso 12 Novema 2014 i le 11 i le taeao. O lona sa na faaulufale e le Susuga Alataua Sootaga F.S., o le Susuga ia Vaigalo Maua FS sa tatalo, o le Susuga ia Tafa'i Galumalemana sa saunia le upu faamafanafana mo le tina ma le fanau ma aiga. O a'u sa molimau ma ta'ita'i.

Faafetai Fusita mo le mafutaga, manuia le malaga.

Rev. Elder Faatauoloa

Maulaivaio - EFKS Falefa

## “Lo'u Afafine e, o Lou Faatuatua ua e Malolo ai”

fafine ina ua ta'u o ia e Iesu o lona “afafine!”

O Leo Tolstoy, le tusitala ta'uta'ua o Rusia, na ia fai le tala e faapea, a o savali atu o ia i se isi auala o le aai, na ia ui atu i tafatafa o se tagata mativa 'aisi. Na autago ifo Tolstoy i lana taga mo se tupe e ave ma le tagata 'aisi, ae leai se mea o iai i lana taga. Na tu atu Tolstoy i luma o le tagata ma fai iai, “Si o'u uso e, malie lou lotu ua leai se tupe i la'u taga.” Ae na pupula fiafia mata o le tagata 'aisi ma fai atu ia Tolstoy, “Ua sili atu le mea ua e aumai mo a'u i lo se tupe o o'u mana'omia. Ua e ta'u a'u o lou uso.”

E faapena le mea na fai e Iesu i le fafine ma'i puna toto. Pei o se

teu fugalaau manaia le mea na fai e Iesu ina ua ia ta'u le fafine, o lona “afafine!” E tuu faafeagai nei upu alofa ma upu mamafa ma malolosi e masani ona tatou lafo i nisi pe a tatou feita, le malilie, faailoga tagata ma tau faifai ona tatou faapea lea: puaa! tufanua! maile!

Ae fai ane le tagata mativa ia Tolstoy: “Ua e ta'u a'u o le uso!” Ae fetalai Iesu i le fafine 'alofia ma uiuimamaoina e tagata: “Si o'u afafine e!” E ese le suamalie ma le logomalie o upu e lafo ma le alofa.

Fai mai le talatuu e faapea, e le'i mafai ona galo i lenei fafine le mea na fai e Iesu ia te ia, a ua mulimuli i le Alii, e oo i le taimi na ia tau'ave ai lona satauro i Kalevario. Fai

mai nisi o ia o Veronika, le fafine na savali ma mulimuli atu i le Alii a o amo lona satauro, ma ina ua tafe ifo le afu i ona fofoga, na ia tago atu ma solo lona muauulu. Tatou te le iloa pe moni lea talatuu, ae ono moni. Aua e faapefea ona galo i le fafine lona faamalologa! Ma lona faamamaina! Ua mafai ai nei ona auai i soo se mea e fai i lona 'aiga; i lona nuu; ma ua mafai foi ona ulufale atu i le malumalu e tapua'i faatasi ma isi tagata.

A o le vai lava, *medicine*, na mafua ai, o Iesu mamana! O Iesu o le vai o le ma'i. O ia lava le fofu o o tatou ma'i.

Faatuatua moni ia Iesu. Papa'i moni ia Iesu. Sa'ili ma le talitonu ia Iesu. O ia o le vai! O ia o le *medicine* o o tatou ma'i. O ia o le vai mamana.

“Lo'u afafine e, o lou faatuatua ua e malolo ai.